

**NAKILOGIAENA**  
**Naña Yoane Pisuia**  
**Ana Siriyuia**  
**Visayuena Na Tusi Nene**

*Suniena plas na tusi nini*

E tusi nini, Yoani siriyu suri la naña Yesu Kristo kila meraravan pania. Tusi nene, kiena kia na plas “*Nakilologiaena*”.

Yoane siri tusi nini e pogos naña le Rom lala akila suri m̃arera manene la pañisi pa li nalelagaena lala, a asum̃a añeñom̃ari la ke amarmare, komin naña amlelaga e Yesu Kristo. Yoane siri m̃aki nini vena visirplanen sitomiena kiena la nene, vena asum̃alu m̃arera e pogos m̃arera lala.

E tusi nini, tekilia teulo suri la naña sane m̃eniena naña Yesu kila meraravan pa Yoane, naga pisayu totou na suri lala vena li nalelagaena la e pogos nene akilia alogakilalea kana kinasa. Ana yaru tañena lala tañatete akilia kana kinasa. Sitomien kiena totou lala na tusi nene sanini. Yesu Kristo, naga pe Ntewa namava, a pe kieta Suñe, a e limana, Ntewa yoko kila kare make nena Yermare amio nasinekar tañena lala. Pogos naña kila make yum̃aena nene, yoko naga la nalaena kiena yaru la naña asum̃alu m̃arera e kiela lelagaena lala. Yoko were la ava asike amio naga mae peni viu a e yomarava viu naña naga kila ruru make rui.

*Komþasnen tusi la na nini*

Visena þesa 1:1-8

Suri þesa naþa Yoane mēnia pisuia, ana lumāki  
lala pae sumāre olua 1:9—3:11

Tusi naþa ve yaru vike re, naþa suri la olua  
sike ea 4:1—8:1

Kumasua olua 8:1—11:19

Alkita amio suri mali lua naþa la apiowa paþisi  
12:1—13:18

Suri na mēniena taþena la naþa Yoane pisuia  
14:1—15:8

Pialora olua naþa apulen sinemimiena kiena  
Ntewa 16:1-21

Ntewa kila kare pulkumali naþa Pāpilon a  
taulu surmali naþa piowa, amio navisalu-  
aena kokani, amio Yermare 17:1—20:10

Ntewa la nakoena va yaru lala e legiena maro  
20:11-15

Peni viu amio yomarava viu, a Yerusalem viu  
21:1—22:5

Visena maro 22:6-21

*Navisa meraravanen tus nini*

<sup>1</sup> Tus nini naga nakilologiaena na sur ya la  
naþa yoko aim aṃaliv e legiena la naþa pimi ke  
na wa. Ntewa sinenan yar la naþa amiyuṃae  
kiena ke e yomarava la monar akilia ruru sur la  
nini, ana naga mla nakiliaena la nene pa Yesu  
Kristo, yoko Yesu pitetalia kiena navisi tai pimi  
ṃalivin kiena yar na yuṃaena naþa Yoane, kila  
sur la nene pimi þarpoyo e kiena mēnien tai.

<sup>2</sup> Yoane toḷ mēniena nene, ana pisu kilale sape  
nanene visena kiena ne Ntewa pe lelaga, pe

visena lelaga nena napo naña navisa meraravannen ya naña yoko Yesu Kristo yuñäen sirau, kila narui siriwal ruru make sur naña naga pisuia, vena nasirau takilia tauloia.

<sup>3</sup> Ana yoko yar a naña wolo visena na visawalen la nene, pona yagogonia, ligán ruru teke e sinena, yoko na visaruruena kiena ne Ntewa ve keviu e kiena malena, komin naña pogos na legiena keviu nene pimi ke lavis manene laa narui.

*Yoane siar visawalen kiena mñeniena e visen tai nayeluaren Ntewa*

<sup>4</sup> In na Yoane, nesiri plan visena la nini imñasu van amiu pegas na lelagaena la olua naña asike e pulkumali lala e pupia lepas naña tepio tesape Esia. Nekekaran naña nevitawe amiu e kia kien naga naña sike na konua rui, sike nanagane, a yoko sike sike lue. Nemlen wo amiu ke nesape pupia lemamiēna a sumñare sike e kiamiu malena la silaga, naña yoko tol amiu imi kome kieta Ntewa nene amio kiena ninuna olua naña asmñal asike vamon kiena lele wa na totanoena.

<sup>5</sup> A kilia imi mñena kome Yesu Kristo, naña naga masisu mña pano kana kuruta mlau, siraunia naga pñes naña mal si petan marena, naña nagane naga pe pñarin supe kiena ne pñarin supe na yomarava lala.

Ee, Yesu Kristo ke nanene narui naña naga sinen sii ita pañisi pano-o tamñan kana kuruta mlau vena ul plan ita vetan koaena na kieta mlamulen viowa lala,

<sup>6</sup> ana naga pisirlua ita teim teve mratava ve taaga na lus kiena ne kiena narin suŕe lala, a naga mligan plan ita vena teiila naga sa naŕa tepe yar wa na yuŕnaena kiena ne arimana, nane Ntewa na mava.

Yesu na kila po pan ita sanene wa, ana popon teyeluar kiena kia, tevisirlua naga va manene laa metava, vano vano-o ve ƕisi re pogos tai, sanene.

<sup>7</sup> Avisu ruruia! Naga ke narui naŕa suŕna kupanpo lul la metava mŕalivin sape vitom tano! Yoko ita make ga kilamarata visuia, ore, amio mŕena la naŕa asuar naga e lak torovia, la mŕena yoko avisu kilale si naga. Ana yoko pupia sineyeena a tagena molue e yeririna na yomarava lala pogos naŕa asitomŕal si e ya naŕa la akila pan nanua sumo. Yoko ve sa ke nene narui, nevisa “sanene” ea.

<sup>8</sup> Popon tewatanon Suŕe Ntewa, Ntewa na mŕareraena nae meta manenea, naga naŕa sike kemua rui, sike nagane, a yoko sike sike lue, naŕa kiena visena urmi tai pisa sanini, sape “In na nepe purŕesa, in na neve luasa.”

### *Yoane pisu totou na Yesu*

<sup>9</sup> Kam erau make lala, in Yoane in na nepe wenla amiu, naŕa nevisawal sur make van amiu. Nesape nevisawal van amiu komin naŕa ita ke narui naŕa tepe kiena ne Yesu, ita ke narui naŕa tesike vatanon kiena nasuŕpenena, ita ke narui naŕa tesuŕna toŕar pae ke nalogeen viowa na

pog m̃arera nene, a ita ke narui naṗa tesuṃa takawean ita ke temio sitomena napiayavi.

Pogaga, kiau sunena va sanini, sane nanua sumo, nesuṃa nepisawal ke visen kiena ne Ntewa, nemlologon m̃a Yesu Kristo pano-o, le Rom la amla nakoena pan inu, amligan inu nepim nemiyuṃae korena e narin purvanua nini, kien kia Patmos.

<sup>10</sup> Ana e Legiena Wa tai, nesuṃa sane nemloge sane Ninuna pimi e inu, nemloge pulgo tai varaun inu, pulgon keviu sane kumasua mielu, pisa sanini sape

<sup>11</sup> “Ya ne yoko ovisu ne, ovisuia osirilua va e tus tai, yoko oligan va teliliv viora e suṃare punu ga na lepas nae Esia, vena akilia auloia.

Suṃare la nene, la olua, nane Episas, Suṃana, Pekaṃam, Taeatara, Satis, Pilatelpia, a Laotisia.”

<sup>12</sup> Pulgo nene suṃa pis pan inu sanene, ana sineun nesape nevisu ane sanene, noṗarpu inu sane nepisu lan kantel ga la sike na, la olua naṗa amiyuṃaen e kol.

<sup>13</sup> Lan kantel la asṃal ga asike sanene, ana yoko noṃal yar tai suṃal sike likan la, naṗa naga sanena naṗa asape Narina ne Yeririna. Naga miyen kulgota piavi tai, amio kulmrae tai naṗa amiyuṃaen e kol, atelan ṗaro e yerena.

<sup>14</sup> Vilṗarina, miyuwowo na miyuwowo manene laa, a kilamarana tego sane kap naṗa mluamene.

15 Lana m̃arera ruru po, sane pototo naṗa m̃arera ruru po, pilavila, a pogos naṗa naga piš, pulgona m̃aaga sane sii naṗa ṗanpo e piañe.

16 Naga suñalar suña ga sa naṗa e limana marua, mlarar ke verue olua, a playu na mara naṗa mal na mal e lepas luwoka molue ke kome logona. Marana m̃ena ga, suwala, miyuwowo na miyuwowo, sa naṗa mrae tego m̃arera kolpae.

17 Nepisu sanene, lelaga, kila narui nemare nenaga, nemlor nena e mialana. Ana kian limana marua pimi tol inu, pisape  
“Ve omarau re, in naṗa nepe nasiarena a nepe naluasa.

18 Naga naṗa pe purṗes nen malena, inu, komin nemali, ṗisna nemare, ṗisna nemal sina, ana nemal lue narui.

In ke narui naṗa ki namarena amio ki na pulukapi viowa kiena ne yar na marena lala sike e luñau.

19 Ana marauen toko, osiri plan ga ya naṗa opisu ke ne, naṗa lepas nanagane, ṗarar lepas naṗa na legiena la naṗa pimi ke na wa.

20 A nevisa sur ta van ko sumo wa, e lepas na verue olua naṗa opisu e luñau, amio purṗes nen kantel olua naṗa amiyuñen e kol. Sur la nene sane kiliaen tai naṗa tapolou, ana kala kinasa sanini, verue olua nene, naga navisi la olua vena visuaren suñare la olua.”

## 2

### *Lum̃aki na suñare olua*

---

1:17 Nakilol 2:8, 22:13

<sup>1</sup> Ana Yesu pisa ke sina pan inu, sape “Nagane yoko nevisawal ya naña okilia osiri va vininua sumñare olua nañani.”

*Mak nasumo, naga va e sumñare nae Episas, naga sumñare naña pe sinesiiena su re e poli*

“Osiri ñesan ñmak va van navisi na sumñare na pulkumali naña Episas, osiri sanini, ovisave ‘Visena nene pimi pan amiu pimi kome naga naña mlarar ke verue olua e limana marua, sumña mjaloro teteliv ke likan miasin kantel la olua nañani.

<sup>2</sup> “ ‘Naga pisawal pan amiu sanini, sape, “In na nepisu kilale amiu rui. Nepisu kiamiu yuññaena wo lala, nepisu naña aña pañisi, nepisu naña añararan amiu amio kiamiu sitomena viayavi lala po pañisi. Nepisu ñena po pañisi sa naña pe atañan re yar viowa la apim akila kare amiu poli, komin naña lañas, pog naña apim añalivin amiu, apisape la ape li na lologena, ana sa naña kam na akilali la, a apisuveve ruru la, ana akirawal rui sane apisokan ga.

<sup>3</sup> Komin ga kiau kia naña amla ke rui, kam na apane pog ñarera lala, a la akila kare amiu, ana nekilia rui kam na pe amligan re poli wa, kam na apuarar ke ñarera wa, a sitomen naña kam na asape sinemiu male pañisi, pona amloge sa naña toroki, nanene naga pe to re nena e amiu poli.

<sup>4</sup> “ ‘ “Kiamiu ñelaga la nene na po pañisi, ana lelaga, sur tai teke naña kam na asuñña akila ke ne naña in na pe nekekarar re nena ga, a nanene na popon nevisawal mesmesun nena van amiu. Naga sanini, naña sane pupia sinesiiena naña

toḗsan e amiu, nagane pito laa tano, pe sa re si nanua poli.

<sup>5</sup> Akilali naḗa sinemiu wasuḗe si e pupia ḗelaga na sinesiiena wo nanua ne, naḗa sinemiu sii inu paḗisi, a sinemiu siisii amiu amio yar taḗena lala. E pogos nene na po na po, ana nagane na, pito tano na pito tano. Ana pogaga, monar avilon amiu ga, a monar awasuḗe amiu e yo wo naḗa asu ḗes e sumo. Ana visae ve avilopu amiu re, nekilia nesape yoko neim nomālivin amiu, neurelua purḗes nen kap vivaga naḗa suḗal sike ne pivaga ke likan amiu nagane.

<sup>6</sup> “ ‘ “Lelaga, naga nene naga kiamiu pupia napiowaena tai ne nepisa ga pan amiu na wa, ana sineun nesape nevisawal ḗena van amiu sane kam na akila ḗena pupia sur wo tai, naḗa nekekarana paḗisi. Nane naḗa kam na asuḗa akawe amiu ke amio la naḗa akila ke sur nawowe taḗena lala, naḗa yar naḗa Nikolaita mlologon ḗesania. Apiowa ga, in ḗena ga yepmavin nenaga.

<sup>7</sup> “ ‘ “Yar naḗa kiligan teke ea, popon loge kilale ya naḗa Ninuna ne Ntewa pisawal ke pa ḗegas nen li na lelagaena lala. Yar naḗa suḗal ḗarera suḗa vano-o taulu naviowaena, yoko netamān vana vena kilia va su nena loyuḗa likan lokove nowo kana ne Ntewa, va kan mrasnen lak na malena.” ‘ ‘ ”

*Mak na lua, naga pa e suḗare nae Suḗana, naga suḗare naḗa yar la sinela karia*



<sup>8</sup> “Monar osiri m̃ak va va navisi na suṃare na pulkumali naṓa Suṃana, ovisa sanini, ovisave ‘Visena naṓa pimi pan amiu, pimi kome naga naṓa naga ṓesa a naga maro, naṓa aṃeṃar mare, ana siraunia maḷ sina.

<sup>9</sup> “ ‘Naga visawal van amiu sanini, sape “In na nekilia ruru pog m̃arera la naṓa kam na apisuia, a nekilia nesape limamiu koren ga. A monar akilia naṓa pe limamiu koren re poli, ana ape yar na sur moki paṓisi! Ee, nekilia sane la naṓa asape la ape le Yu, akuan ke visen viowa mok liu pan amiu, ana ve asitom re, pe nepisu re nena nesape la ape kiau le Yu la poli, peraga, la na ape yar na taveven nena Yermare.

<sup>10</sup> A pe lelaga, pona ve ve piavi re kam laṓasa monar awar pupia naloge viowaena la yo, komin naṓa amlelaga e inu, ana ve amarau re. Pona Yermare kilia kila naṓa yoko akoven amiu laṓas ava e yuṃa nakoena yo, vena kilali amiu, ana nekilia nevisave naga yoko kila kare amiu vano tol ga legiena ve lualima. Visae sanene, monar asuṃal m̃arera vano-o tol naṓa alalua kiamiu yalua, ana visae ve alor re e pogos nene, yoko pogos naṓa aim aṃalivin inu, yoko nela pupia nalaena van amiu, nane karo naṓarila namaliena naṓa pe kol.

<sup>11</sup> “ ‘ “Yar naṓa kiligan teke ea, popon naga loge kilale ya naṓa Ninuna ne Ntewa suṃa pisawal ke pa li na lelagaena lala. Yar naṓa taulu ṓelaga viowa na malena nene, yoko naga ve va warpo re yo e marena na lua naṓa yoko imi sirau.” ‘ ‘

*Mak na telu, naga pa e sum̃are nae Pekañam, naga sum̃are naña tañan navianena viowa tañena lala apim loyuma*

12 “Yam si tai, monar osiri m̃ak va va navisi na sum̃are na pulkumali nene Pekañam, ovisa sanini, ovisave ‘Visena naña pimi pan amiu ne, pimi kome naga naña p̃arar ke playu na mara naña mal ga lepas luwoka.

13 “ ‘Naga pisawal pan amiu sanini, sape “Nek-ilia ruru sane e naña kam asike e ne, naga lepas tai naña likan nena yo naña Yermare pe suñenia! Naga lelana lala sike ga ko pun amiu ne, ana kam na apuarar ke kiau kia na po pañisi. Nanua loyuma e kiamiu pulkumali nene, pona tevisa tevisave pulkumali kiena Yermare, la añem̃ar kiamiu puruvi naña Antiñas, ana la añareran asape kam na monar aluñar kiamiu lelagaena e inu. Ana peraga, sa naña naga piawa m̃a m̃arera e inu pano tol marena, kam m̃ena ga yar tai pe purmatan inu re poli.

14 “ ‘ “Naga nene naga lepas napo ne, ana sur lañasa naña sineun nesape nevisa m̃ena van amiu. Sur p̃esa, loyuma e kiamiu p̃egasa, yeririna lañasa asuma naña ataveve ke sitomena lañasa sa ke ga Navisawalena Pelama nanua. Visae asitom̃al m̃aga, naga ke narui naña pisayu mrapa lañasa pa Pelaka, ana pe piavi re poli Pelaka towea mlavia pa pisayu pa le Israel lala, kila sanene pe piavi re poli, la asuma akan kinanena wa la naña yeririna tañena la akila kuñapaena ea pa kiela nono lala, a la asuma akila lue ga kolau lala. Akila ke mlamulen piowa la

ne sanene, ana taveve visena naña amloge ne, la asitom asape pogaga.

15 “ “ “A kana na lua nena, lañas si naña kam na ataňan la asike likan kiamiu li na lelagaena lala. Naga nene la naña asumña ataveve ke navianena na wowe taņena la nene, naña yar nene Nikolaita naga mlologon ųesania.

16 “ “ “Visae ve sa nene, kam na monar avilopu kiamiu sitomen vetan naviowaena la nene! Visae peraga, yoko ve ve piavi re neim nakate pun amiu, a yoko visen la naña nevisa e gou van la e pogos nene, yoko ve sa playu na mara naña te kinekinela, kilapel la vaņisi.

17 “ “ “Yar naña kiligan teke ea, popon naga loge kilale ya naña Ninuna ne Ntewa pisawal ke pa ųegas nen li na lelagaena lala. Naga naña taulu napiowaena, yoko naga la kiena nalaena wo tai. Yoko nela kinanena tai vania, kinanena nena sa naña le Yu la akan e yokorena, ana naga nene na pe kinanena tai naña pe yar pisu re poli wa. A yoko nela kilavaru yuwowo tai vania, naña ate kia viu tai sike ea, naña naga naña waria, naga ga yoko kilia ruru kana kinasa.” ’ ”

*Mak na vari, naga pa e suňare nae Taeatara, naga suňare naña taňan ga ųelaga piowa suňa loyuňa ea*

18 “Pogos si tai, monar osiri mňak va va navisi na suňare na pulkumali nene Taeatara, ovisa sanini, ovisave Visena na pimi pan amiu pimi kome Narina ne Yeririna, naña kilamarana pila a

pivaga sane purmenen kapi, a lana m̃arera sane pototo.

19 Naga pisawal pan amiu sanini, sape “In na nekilia ruru kiamiu yum̃aena lala, a kiamiu sinesiiena lala amio kiamiu naviawaena, kiamiu yum̃aena m̃arera a sitomena la naṗa piayavi, a metavanja nekilia nesape nagane kam na akila pa laa narui, taulu naṗa akila ṗesania.

20 “ “ “Naga nene naga kana lepas napo ne, ana sur si tai monar nevisa meraravan van amiu. Nanene e lepas na sira viowa nene, Sesepele, naṗa apisu kilale kiena napiowaena lala, ana atam̃an ga kila m̃a wowe e sur viowa la naṗa kilakila ke ne. Naga sape naga pe sira tai naṗa pe navisawalena, a pona kam na amlelaga e naga yo, ana naga pisokan ga ne. E kiena navianena lala, naga sum̃a ṗere yar na kiau yum̃aena la apa ape taṗena la narui, naṗa nagane asike e ṗelaga na mlamulena na kolauena rui, a asum̃a akan ke kinanena kana nono lala, a la asitom asape ṗelaga la nene na pogaga ne.

21 In na nemla pulmas pania vena sitom ruru sina, vilon naga vetan kororak la nene, ana naga yepen mavin ga.

22 “ “ “Pogaga, kiau sitomena teke rui sane yoko nekila naga m̃ene tog tai na maiena m̃arera lala, a yoko nekila yar la naṗa akila kolau amio sira nene, visae ve avilon la re e kiela mlamulena viowa lala, yoko la m̃ena aloge viowa vaṗisi na vaṗisi.

23 Sira nene, yoko taṗatete narina mali, yoko sineu kar la make ga. Ana pogos naṗa la na ṗegas nen li na lelagaena la avisu sur nene, yoko avisu

kilale sane in ke narui, kiau navisuveveena telivi pano tol ya naþa teke e sinen yaru, a kilia lual ya naþa teke e kiena sitomena. A yoko avisu kilale mēna sane in ke narui nesuñā nekila maran ke pa yar lala torokin ga þelaga na sur la naþa akila ke e kiela malena lala.

24 “ ‘ “Ana e lepas na pun amiu kam yar taþena lala nae Taeatara, nekilia nesape kam na pe ataveve re navianena kiena ne sira nene poli. Naga kilali naþa koven visen kiki la pan amiu, sane yoko naga vike sitomena urmi la naþa tapolou van amiu, ana kam na apisu kilale naþa Yermare ga naga pe purþesnen visena la nene. Yoko ve nevisa re si sur taþena van amiu,

25 ana nevisa ga sane kam na auarar ga visena lelaga la nene mārera naþa kam na atol rui, ve aligan re, auarar la mña vano-o neim si na.

26 “ ‘ “Naga naþa taulu na viowaena, kila ga taveve ya naþa sineunia vano-o tol luas nen pogos nini, yoko nela pupia nalaena vania. Yoko netamñan vania naga ve suþen purvanua lala,

27 sa ga naþa Tus na Yawena la pisayuia, naþa sape

*Naga yoko ve suþen yeririna lala naþa laki naþa mlarar ke e limana, naga pe pototo mārera tai,*

*a la naþa ape þarmārera, naga yoko kuan wowa la e porotano ave kinakinasia sane piaki tai naþa amiyuñāen ga e porotano. Yauena 2:9*

“ ‘ “Namāreraena na kilaen sanene, Ata tamñan pan in rui, ana yoko netamñan lein va kiau yaru nene.

<sup>28</sup> Ana pe naga re ga nene poli, ana yar nene, yoko neligan verue naña Melag sike e limana.

<sup>29</sup> “ ‘ “Yar naña kiligana teke ea, popon naga loge kilale ya naña Ninuna ne Ntewa pisawal ke pa p̃egas nen li nalelagaena lala.” ’ ’ ”

### 3

*Mak na lima, naga pa e suñare nae Satis, naga suñare naña momalio ga mon m̃aga*

<sup>1</sup> “Monar osiri si m̃ak va va navisi na pulku-mali na suñare nae Satis, ovisa sanini, ovisave ‘Visena nene naña pimi pan amiu ne, pimi kome naga naña pisuar ke ninuna la olua kiena ne Ntewa amio kana verue ne la olua.

“ ‘Naga pisa pan amiu sanini, sape “In na nekilia ruru kiamiu yuñæna lala. Amiyeluar amiu pañisi, asape kam na suñare tai naña mal ruru po, ana peraga, in na nekilia ruru pañisi kam na amare ga añeke na.

<sup>2</sup> Nagane pe pogos naña kam na akirava towe narui. Kiamiu yuñæna lala, in na nom̃al sane e visuena kiena ne Ntewa, kam na pe akila make ruru re poli, a kam na akila pe po re nenaga. Kiamiu kapi pe kovio make re poli wa, ana naga suña panon ke naña lavis mare narui, ana komin sur ne nanene, nepisa ruru pan amiu nesape kam na monar ayuñæen ruruia vena imi wo sina.

<sup>3</sup> “ ‘ “Visae ve sanene, kam na monar asitoñal si visena wo la naña amloge, a amla rui. Alogear ruruia, a avilon kiamiu malena wasuþe si na,

komin naþa visae ve atavilo re, nekilia nevisa nena van amiu sanini, yoko neim nomalivin amiu sane yar na vinauen tai naþa kam na taþatete akilia.

<sup>4</sup> “ ‘ “Ana lelaga, nekilia nesape kam nae Satis, kam pe moki re poli naþa asumã pogaga, naþa pe akila re m̃ala kulsota la namname poli sane laþasia. La ke narui amekiki ruru nenaga, ana yoko ayen sur yuwowo, ayaloro amio inu meva e kiau yo.

<sup>5</sup> Yar a naþa taulu naviowaena, naga m̃ena yoko ayowa ruru wo e kulsota yuwowo la ne sanene. Naga, kiena kia taþatete nena neyumu-lua e tus namalena pogos tai, ana yoko nekilologia naga va Ata amio kiena navisi lala, nevisave yar nene naga pe kiau yar lelaga nena napo.

<sup>6</sup> “ ‘ “Yar naþa kiligana teke na, popon naga loge kilia ya naþa Ninuna ne Ntewa sumã pisawal ke pa þegas nen li nalelagaena lala.” ‘ ”

*Mak na orai, naga pa e sumãre nae Pilatelpia, naga sumãre naþa pulmas wo na kilaen yuãaena sike e marana*

<sup>7</sup> “Monar osiri si m̃ak va va navisi na sumãre na pulkumali naþa Pilatelpia, ovisa sanini, ovisave ‘Visena naþa pimi pan amiu ne, pimi kome naga naþa pe wa, a pe lelaga, naþa naga ke narui naga þar ke ki na kiluaen pulutava m̃ana Parin Suþe Tepet nanua. Ya naþa naga vietavania, taþatete si yar tai kotawea, a ya naþa naga kotawea, taþatete si yar tai vietavania.





na loyuña e yuña wa ñana Ntewa, yoko yar nene sulue sike loyuña nene narui. Yoko neyowauia naga amio kia la naña nesiri se ea, sane kia kiena ne kieta Ntewa, a kia kiena ne pupia pulkumali, na Yerusalem viu, naña mligan ma e peni kiena ne kieta ne Ntewa pitomi, a amio la nene, yoko nesiri ñena kiau kia viu ea.

13 “ ‘ “Yar naña kiligana teke ea, popon naga logekilale ya naña Ninuna ne Ntewa suña pisawal ke pa pegas nen li nalelagaena lala.” ’ ”

*Mak na olua pa e suñare nae Laotisia, naga suñare naña pa piowa rui, ana pe asitom re sur poli*

14 “Na maro, monar osiri ñak van navisi na suñare na pulkumali naña Laotisia, ovisa sanini, ovisave ‘Visena naña pimi pan amiu pimi kom pun naga naña pe ñarin sur make ga, naña naga ga kilia visave “Sanene.” Naga masisu pona pe lelaga e Ntewa vano tol naña kana kuruta mlau, a naga pe suñen wetelun yomarava naña Ntewa siia.

15 “ ‘Naga pisawal pan amiu sanini, sape “In na nekilia ruru kiamiu yuñaena lala, a nekilia nevisu kilale sane pe kiamiu sitomena la manin manene re poli, a pe pisun manene ruru re ñena poli. Popon manene la naña visae sinoñan omanini, ko omanin ruruia, pona visae ovisunu, ovisun ruruia, ana naña sinemiu la peve lua ga sanene, ñelaga nene pe sineun re nenaga.

16 Ana komin naña sinemiun amanini a sine-miun avisun sanene, in na nesape neluelua amiu e logou narui.

17 “ ‘ “Kam na asape amiyuwon polo kiamiu sur wo la mokliu, ana kam na asape tařatete yar tai kilia la sur van amiu, kam na amla ke rui. Ana peraga, e kiau navisuena pe sa re nene poli. Kam na pe apisu kilale amiu re poli, ana pe kiamiu sur wo re nena tai, kam na limamiu koren ga, kilamaramiu řala, a yepemiu mian ga.

18 Nevisa van amiu, popon awasuře si aim pun inu, aim awar kol nini nařa kap kekan van kana namname rui, vena akilia alarar sur wo tai e limamiu. A popon aim awar kulmrae la nařa miyuwowo, vena akalo amiu, vena ve amawa re, a popon aim awar mřaki na vilanen e kilamaramiu, ana vena akilia akirava sina.

19 “ ‘ “Yaru ai nařa sineu siia, monar nevis vania vena nakawe ruru kiena malena, ve sanene, monar ala kiau visena lala, ana avilopu amiu.

20 Ayagogo ruruia! In na nesuřal nesuřa nesigariga ke pulutava na kiořa malena. Ko nařa ologe pulgou pio, ovietavan inu, neiřasu loyurřa italua tesun, italua tekinana.

21 “ ‘ “Naga nařa suřal mřarera vano-o taulu naviowaena lala, netařan vania sane naga topae amio inu e leleu wa na totanoena, sa ke ga nařa in mřena netaulu kiau nasinekar, ana siraunia Ata řere inu netotano ke nemio e lelenu wa na totanoena.

22 “ ‘ “Yar nařa kiligana teke ea, popon naga logekilale ya nařa Ninuna ne Ntewa pisawal ke pa řegas nen li nalelagaena lala.” ‘ ‘

## 4

*Ntewa na lelana naña meta manene laa ma e peni*

<sup>1</sup> Pogos naña nepisu pae sur la nene, noñal ke sina ga pulutava tai navaen loyuma ma e peni, ñeke ga vamon inu. A nemloge ke sina ga pulgo naña pis pan inu nanua, pis na pulgona miyelu keviu sane kumasua, ana pisa pan inu, sape “Ovam meta e nini sumo wa, vena nekila ovisu sur la naña yoko aim sirau.”

<sup>2</sup> Pisa sanene, ana veraga ga, nemloge sane Ninuna ne Ntewa ñerelua ninuu, mligan inu ma e peni, ana nekira pa e pupia lele wa na totanoena tai ñeke ga e marau, naña yerka wa tai totano teke ea.

<sup>3</sup> Nepisu sa naña pila, ñar maran kilavaru la naña po na po, a kana kap nena miyervivia sa ga kuperierier.

<sup>4</sup> Kana pupia lele na totanoena nena ñeke ga lika, a lele na totanoena ñena lañasa miyervivia, nopuloia tol lualima yam lua pa vari [24]. E la peve taaga, yar taaga teke e tai kila sane la ñena tol lualima yam lua pa vari [24], la nene ape nasumonena nae ma e peni lala. La nene, ñala kulsota la miyuwowo pañisi, a amien karo na ñarila naña pe kol.

<sup>5</sup> Nesuma nepisu ke sane, nemilan ñena yekarpla ke ga likan yo wa nañani, amio ñaagena na pupia polilu tera ke ea. Vamonia, kap vivaga la olua asuma apivavaga, naga nene nane ninuna ne Ntewa olua,

<sup>6</sup> asñal asike e yotop tai, naña meri ga ñeke na sa ga sive, pilavila a merarava ruru po sa ga kupito.

Ana likan yo nañani, yar mali la vari asumãga, naña kilamarala la moki liu sike vamon la a varaun la, asumãal lavisi, asuvivi pupia lele wa na totanoena.

<sup>7</sup> Yar mal ñes nene, sa ga laion, na lua sa ga puluk naña purwolu, na telu naga ñar ga maran yaru, na maro na sane pepaumã.

<sup>8</sup> La nene, la make ga kupela la orai, naña kilamarala la kalo make ruru ñena kupela la nene, pa ñena e pulugala.

La nene kiela yuñena, legiena a yemalo, la pe aparurula re pog ta poli, la asumãal apisawal lue ga, asape “Ntewa na ñareraena na mava, naga su ñesa, naga sike nagane, a naga sike sike nena. Naga pe wa naña pe wa, naga pe wa pañisi.”

<sup>9</sup> E visena la ne sanene, la asumã apisirlua ke kia kiena naga naña totano teke lele wa likan la, apatanon ke naga, asumã apisa ke potena pa naga naña yoko mal lue narui. Pogos naña asumã apisa ñaga,

<sup>10</sup> nasumonena ñena la nene apatanonia, amlotun ke naga naña tañatete mare pogos tai. Ana siraunia, añar plan kiela karo na ñarila naña pe kol, amligan su tano se lana, asape:

<sup>11</sup> “Kiamim Suñe Ntewa, mesmesun naña nau-rarena, navatanonena a nañareraena make ga, ala van ko, kioñã ko ga taaga. Ko ke naña osii make sur narui, e ga e kioñã nasinenanena atol kiela malena rui.”

## 5

*Tus naña apulonaria, amio narin sipsip, naña lalua asike ma e peni*

<sup>1</sup> Ana yokorena nepisu si yerkawa nene naña totano teke e lelena wa, naga mlarar ke sur tai e limana marua, sur nena naga tus tai, naña asiriga e lepas luwoka, p̄isi na apulonaria, ana atelan kana lok olua suwoia.

<sup>2</sup> Ana nemloge pupia navisi tai pion manene pa metava, piunia pisape “Ane torokin kilaroro lok la nene? Yar tai sike ne kilia vae tus nene woga pona peraga?”

<sup>3</sup> Moña ga sanene pano-o, peraga, pe yar re tai naña ma e peni pona yomarava, pona vatanon yomarava, naña kilia vae tus nene poli, pe yar re nena tai naña torokin kira va loyurña e poli.

<sup>4</sup> Nepisu sanene narui, nemloge piowa, netagi na netagi, naña tañatete yar tai kila.

<sup>5</sup> Ana nasumonena la tai nene pis pan inu, pisape “E, ve otag re sina! Opisu ke ne, nanene naga laion naña molue kome yeririna la nae Suta, naña apio asape lus kiena ne Tepet, naga taulu make sur la p̄isi rui. Naga ke narui naga kilia kilaro lok la olua nene, naga ke naña yoko vae tus nene narui.”

<sup>6</sup> Ana nekira pano, pe laion re poli, ana nepisu narin sipsip tai suñal sike likan yar mal la vari a nasumonena lala vamon yo wa nene. Naga pe narin sipsip ga, ana kana lamaliu olua amio kilamarana olua asike e p̄arina. Naga suñal sike na, naga apisu sa naña akila kuñañaena e rui, ana mal ruru ga suña ga.

<sup>7</sup> Naga mial pimi, kuslua tus naña petan limana yerkawa na ðamarua, metava e pupia lele wa na totanoena.

<sup>8</sup> Mla pae, ana yar mal la vari nene amio nasumonena la lualima yam lua pa vari [24] nene amloru e lana. La peve taaga aþar kiela yukalele lala a kiela piala la naña amiyuñæn e kol, pulen ga ponotaninu la naña asikapia, ana kala ponos taninu po paþisi naña pa ke metava, nane leniena lala kiena nalelagaena wa lala.

<sup>9-10</sup> A la amiyaun ke yau viu tai naña sanini,  
 “Akuþaþain ko,  
 ana e komña kuruta  
 opul plan yeririna lala ape kiena ne Ntewa,  
 naña amolue e þegas nen yeririna make ga,  
 e visena kar make ga,  
 e purvanua kerkeviu make ga,  
 a e narin purvanua make ñena ga.  
 Ko osikol la apim ape þegas taaga navatanonen  
 þarin suþe ve taaga ga,  
 aim ave yar wa lala na yuñænena kiena ne Ntewa,  
 naña yoko ave suþen yomarava nini.  
 Ana komin naña okila sanene,  
 torokin sane ko ga taaga ola tus nene narui,  
 owar plan kana lok lala, ovae.”

<sup>11</sup> Nesuñña nepisusu ke sanene, ana nemloge navisi la amiyau, la mok na moki, aña la tenario via na sanene. Amiervivi lele na totanoena wa amio yar mal lala a nasumonena la nene,

<sup>12</sup> amiyau ñarera paþisi, apisa sanini, asape,  
 “Narin sipsip, naña akuþaþainia,  
 naga taaga po na po.

Namãreraena make ga, nawoena make ga,  
 manmaruaena make ga, puriu kawaena make  
 ga,  
 navatanonena make ga, naurarena make ga,  
 nayeluarena make ga,  
 torokin akila ga van naga taaga.”

<sup>13</sup> Siraun nanene, nemloge si surmal make ga  
 la m̃ena amiyau, surmal la naṗa asike ma e peni,  
 amio la naṗa asike e yomarava, pona e porotano  
 pona e sive, kiela yauena pisa sanini, pisape,  
 “Nayeluarena, navatanonena, naurarena, a  
 namãreraena va va yerkawa naṗa totano  
 teke e lele wa, amio m̃ena narin sipsip,  
 vano vano ve uro re.”

<sup>14</sup> Ana yar mal la vari naṗani apisawalia asape  
 “Sanene” komin visena la nene, ana nasumo-  
 nena lala amloru, akinai, amlotun lalua.

## 6

### *Lok la olua na tusi naṗa aplonaria*

*Lok ṗesia: Yerkawa na ṗelaga na kilaen mara,  
 naṗa kus wosi yuwowo*

<sup>1</sup> Nepisu manene m̃aga, nepisu narin sipsip  
 naṗa kilaro lok na sumo na tus nene. Naga kila  
 pae, ana yar mal la vari nene tai pio e pulgo tai  
 sa naṗa polilu, pisape “Oimi!”

<sup>2</sup> Ana nom̃al ga wosi tai naṗa miyuwowo sum̃al  
 sike e marau veraga. Nom̃al yar tai teke meta ea,  
 ṗar ke viu lamias, ana la amligan karo na ṗarina  
 kiena ṗarin suṗe teke e ṗarina, ana kus kiena  
 wosi naṗani kirir pano sane yar namara tai naṗa  
 vanon vena taulu kiena nasinekar lala.

*Lok na lua: Yerkawa na ðelaga na weñaren yaru, naña kus wosi pivaga*

<sup>3</sup> Yoko narin sipsip kilaro lok na lua. Kila pae narui, ana nemloge yar mal na lua pio, naga mña sape “Oimi!”

<sup>4</sup> Ana wosi taña ke sina ga pimi kate veraga, naña pivaga. Yar naña kusia, atañan pania vena va war plan suñarena naña sike e yomarava, vena yar la asumña awewe moñar la. Amligan pupia playu na mara tai e limana, ana naga mña kiriri pano.

*Lok na telu: Yerkawa na ðelaga na visoena e yomarava, naña kus wosi malko*

<sup>5</sup> Yoko, narin sipsip kilaro lok na telu. Kila pae narui, nemloge yar na telu pio, naga mña pisape “Oimi!”

Ana nepisu ga wosi si tai naña malko suñal sike e marau veraga. Yar naña kusa, naga mlarar ke skel tai e limana, vena visuveve kinanena lala kana yeririna na yomarava.

<sup>6</sup> Ana nemloge visena tai molue ga likan yar mal la vari nañani, asape “Ovano, atañan pan ko asape okilia okila naña yo ve plasan kinanena, naña yoko monar aul narin kinanena ga e kilayaru keviu. Ana ve okila kare manene re purpes nen purolip lala naña amiyuñen ke sirveve e mrasnela, a ve okila kare manene re purpes nen kilkerep lala naña amiyuñen waen e mrasnela.” Apisa sanene narui, a naga mña kiriri pano.

*Lok na vari: Yerkawa na ðelaga na marena, naña kus wosi na yepen pe yavi*



<sup>7</sup> Yoko, narin sipsip kilaro lok na vari, kila pae ana nemloge yar mal na vari pio, naga m̃ena sape “Oimi!”

<sup>8</sup> Ana nom̃al ga na wosi taṓena naṓa yepena pe yavi sum̃al ga sike e marau. Yar naṓa kusia, apio kiena kia asape Marena, a naga, kiena erau tai mial ke amio, naṓa kiena kia asape Pulukapi. Ana e lalua nene, ataṓan asape lalua akilia akila viowa va yar ve moki e yomarava, e playu na mara, pona e viso, pona e maiena, pona e surmal tetan lala. Visae ve sanene, yar la vari asike yomarava, la telu akilia asururu ga, ana taṓena tai akilia akilapel naga sanene.

*Lok na lima: Li na lelagaena la naṓa ape masisu pano-o aṓemoṓar la*

<sup>9</sup> Yoko, narin sipsip kilaro lok na lima. Kila pae, ana nom̃al wonta pulen ninuna ne yeririna lala amiyuwon la miyervivi miasina. Nanene la naṓa aṓemoṓar la komin aṓarera e logearen visena kiena ne Ntewa, a asum̃al m̃arera asape amlelaga e Yesu.

<sup>10</sup> La nene, nom̃al atag ke pa Ntewa e pupia pulgo keviu, asape “Ake Suṓe na sur make ga, ope wa a ope lelaga, awis ovisu kilale kamim kuruta nene. Pogwai naṓa yoko okila maran va yar viowa la naṓa akila ke piowa sanene?”

<sup>11</sup> Apisa pa sanene narui, ana aṓar kulsaket yuwowo la pan la amiyenia, ana apisa pan la asape sur naṓa la apiunia naga pere wa. Asape monar asum̃ate li ga ve plas ga wa, komin naṓa kiela erau laṓasa asike ga wa, amio m̃ena kiela puruvi taṓena lala a vinela lala, naṓa

yoko la m̃ena monar awe moñar la komin naña amlelaga, ana pogos naña la punu ga aimi toroki, yoko Ntewa kila ga ya naña la apiun na wa.

*Lok na orai: Legiena maro*

<sup>12</sup> Yoko, nepisu naña narin sipsip kilaro lok na orai. Kila narui, yemninu veraga, a pe piavi re poli mrae pimi malko yemalolo nenaga, a kupario pimi pivaga sane kuruta,

<sup>13</sup> a verue la naña asike ma e sinapane akekapil apitom tano e porotano, sa ga naña mralak mene, pogos naña pupia lagi miyui kululun lasa.

<sup>14</sup> Yoko, avilonar sinapane sa naña apilonar takue akus pano, a tavie make ga a purvanua make ga alen plan la vetan lelela lala.

<sup>15</sup> Ana pogos naña yar la avisu sur la nene, pupia marauena naña pupia marauena. Parin supe na yomarava lala, yerkawa lala, nasumonena kiena ne yar na mara lala, yar na sur moki lala, yar m̃arera lala, amio m̃ena kiela yaru na yum̃aena lala, a yar tañena make ga e yo kar ga lala, la make ga ayalin mesmesun puluve lala pona pulkilavaru, avavinin yo la metava e kunusa, akilayonli naña atapolou ea.

<sup>16</sup> Atol yo la nene, ana marauena pimi keviu manene laa, a apion pa kilavaru lala amio kunus lala, asape “Awis, aloru akalo ruru imimi, vena navisuena kiena ne naga naña teke meta e lele wa ve tol imim re, a vena nasinekar kiena ne narin sipsip ve kila kare imim re.

---

**6:12** Nakilol 11:13, 16:18, Mat 24:29; Mak 13:24,25; Luk 21:25

**6:14** Nakilol 16:20     **6:16** Luk 23:30

17 Pupia legiena na sinekar kien la lua nene pimi rui, a yoko ane kilia sum̃alu mali e pogos nene? Peraga ne, nagane yoko viowa manene laa van ita make ga.”

## 7

*Ntewa pisaar kiena pupia p̃egas nen yeririna tai vena ave kiena*

<sup>1</sup> Siraun sur la nene, nepisu navisi la vari asuñal asike e mrapun yomarava varoka, asuñã akilawo ke lagi vari naṗa amiyui ke e yomarava, vena lagi la nene ve ayui re si e sive, pona e porotano, pona meta e lak lala.

<sup>2</sup> Yoko nepisu ke sina navisi taṗena, p̃ar sur na ween totou kiena ne Ntewa mal̃i van kiena yeririna lala, ana naga molue e naṗa mrae pa meta ea pimi. Naga kilia m̃a sape navisi vari nene, la aṗar ke naṗareraena naṗa akilia akila kare porotano a akilia akila kare sive, ana naga pion manene pan la, pialuṗar pan la vena ve akila re si sur tai.

<sup>3</sup> Pisa sanini, sape “Ei, toko, ve akila kare re sive pona porotano pona lak lala, vano vano tol naṗa teligan totou tai te piamenan yar mesmes lala naṗa ape kiena ne kieta Ntewa.”

<sup>4-8</sup> E pogos nene narui nemloge ga na wa naṗa apisawal nena maran la naṗa amligan totou e la. La nene amolue akom e lus nae Israel la lualima taaga pa lua, naga lus la naṗa aṗar kia kiena yermarua apua kan la nene, nane Suta, Rupen, Kat, Asa, Naptali, Manasa, Simion, Levi, Isak, Sepulan, Sosep, a Pensiman. Ana e lus make la nene, tai kana manu lala tol lualima taaga pa

lua [12,000] amolue komea, kila la punu ga tol sane kana manu ne lala tol ponotia lualima yam vari pa vari [144,000].

*Pupia ñegas tañena lala naña amiyen kulsota yuwowo lala*

<sup>9</sup> Ana siraunia, nekira pa vamon inu narui nomal pupia ñina na yeririna lala, naña moki na moki, tañatete auloia, la ke naña amolue akom e lus tañena la narui. La ke naña ape yeririna tañena lala na purvanua tañena lala, amio kiela visena tañena lala, apim asumal asike vamon pupia lele na totanoena naña narin sipsip totano teke ea. La make ga amien kulmrae yuwowo nowo lala, a añarar mãmela lala,

<sup>10</sup> a apio manene pa metava, asape “Kieta Ntewa teke e kiena lenea wa, naga ga amio narin sipsip, lalua ape purñes nen kieta natamaliaena.”

<sup>11</sup> Ana amio la nene, navisi mēna lala asumal amiyervivi yo wa, a amiyervivi mēna nasumonena lala amio yar mal la vari nañani, ana la mēna akinai añan ñarila pito tano vamon yo wa, amlotun Ntewa,

<sup>12</sup> asape  
“Ee, lelaga pa!

Nayeluarena make ga, a naurarena, a namanmaruaena, a navisaen potena, a navisirluaena, a puriukawaena, a nañareraena, la punu ga nene ape kiena ne kieta Ntewa naga taaga, a yoko ve sanene sulue na sike ne. Yeluaren van Ntewa!”

<sup>13</sup> Ana e pogos nene, nasumonena la tai piun tan inu, sape “Pupia ñina naña amiyen kulumrae

yuwowo la ne, okilia osape a la nene, a okilia osape la asu pe na apimi?”

<sup>14</sup> Ana nesape “E peraga, ana ko ope yerkawa nae e nini tai, ko okilia ña yo?”

Ana pisatamea sape “Ore, la ke nene narui naña aña e pupia pogos naloge viowaena. Kulsota la ne amiyen ke ne, akevanla e kuruta kana narin sipsip nañani, nane apim amiyuwowo ruru sane opisu ke ne.

<sup>15</sup> La na kiela yuñena sanini, sane  
‘La asike vamon yo wa kiena ne Ntewa, legiena a  
lemalo amiyuñae kiena ke loyuña e ñana  
yuña wa,  
a naga naña totano teke meta ne, naga yoko  
visuar la,

<sup>16</sup> Yoko tañatete si viso kar la,  
yoko ve moto karla re si narui,  
mrae ve kila kare la re sina,  
a pupia kapi ve visun la re sina,

<sup>17</sup> komin narin sipsip naña teke likan yo wa meta  
ne,  
naga yoko vagan la,  
naga yoko sumon la ava e purñes nen wii na  
malena,  
a yoko Ntewa yumu plan make wamarala.’ ”

## 8

### *Lok na olua: Yo pa ruru nenaga*

<sup>1</sup> Siraun nene, nepisu narin sipsip kilaro lok na olua. Kila narui, sur make ga nae mae peni aparurula veraga, pe ñaagena re si ta poli, yo

m̃ano nena ga mon m̃a pano-o tol komsus nen aora taaga.

*Kumasua la olua*

<sup>2</sup> A pe yam piavi re nenaga, nom̃al navisi la olua naṗa asum̃al asike e marana ne Ntewa vena kilaen kiena yum̃aena, a amla kumasua olua pan la, tai kus tai, tai kus tai.

*Pias nen ponotaninu naṗa amiyum̃aen e kol*

<sup>3</sup> Ana siraunia, navisi taṗena pimi. Naga kus pias nen ponotaninu tai, naṗa amiyum̃aen e kol, a naga kus pimi sum̃al sike e wonta, naṗa naga m̃ena amiyum̃aen e kol, a naṗa sike vamon lele wa na totanoena. Ana aṗar ponotaninu mokliu pania vena sikapia e wonta vena kila ponos wo, a amla m̃ena leniena lala kiena ne nalelagaena wa lala pania, vena ligan to meta e wonta sane nalaena tai.

<sup>4</sup> A pogos naṗa kapi nene kekan ke ponotaninu nena, kana ponosa amio leniena kiena ne nalelagaena wa lala, amolue petan limana ne navisi naṗani akaka ava atol marana ne Ntewa.

<sup>5</sup> Yoko, navisi naṗani ṗar plategkap laṗas naṗa apranar sike e wonta nene, kokonia pito e pias nen ponotaninu nene ana koven pito tano e yomarava. Ana pogos naṗa suri nene tol yomarava, kila polilu kapur kar ga e yo punu ga, amio kana mumuena sa naṗa kapiapo, amio m̃ena yekarpla, a yemninu.

*Kumasua na miyelu ṗesa: yua amio kuruta*

<sup>6</sup> Ana navisi la olua naña añarar kumasua olua nene, asu ruru ke naña asape ayu narui.

<sup>7</sup> Navisi na sumo miyu kiena kumasua, ana kila narui mrayua la naña ñarera sane kururu kilavaru, amio kuruta naña pisusun sane kapi, aptom akila momar sur kar la e yomarava. Amiyumñan ña sanene pano-o kapi kekan make yomarava kompas amio kana purlaki ne lala, amio sur make naña kapur sike ea.

*Kumasua na lua miyelu: tavie na kapi*

<sup>8</sup> Ana siraunia, navisi na lua miyu kiena kumasua. Nanene kila pupia tavie kar tai, naña kap molue ke komea, akovenlua pito e sive. Pogos na kove sive, ana sive kompas pimi sane kuruta,

<sup>9</sup> ana kana sur mal ne lala amarmare, a waa la naña asike e pupia lepas nene atalilu.

*Kumasua na telu miyelu: verue naña kirir ma e sinapane*

<sup>10</sup> Yoko navisi na telu miyu kiena kumasua. Nanene kila pupia verue tai, naña kapi pivaga ke ea tegoli yo sane kapi vivaga, molue ma e sinapane, miere pitomi miae yomarava. Ana kana kapi nena pa tol wii la naña mlau a ñarin wii lala.

<sup>11</sup> Kia kien verue nene, asape Wii Melkalka, ana kila narui wii nae yo la moki pimi melkalka, ana yeririna la amun ñele ga, moto karla ña pano-o amarmare.

*Kumasua na vari miyelu: yemalolo*

<sup>12</sup> Yoko navisi na vari miyu kiena kumasua. Nanene kila naña mrae komņas pimi malolo, a kupario komņas pe tego re si poli, a verue la moki naña pe añal la re si poli. Kila narui legiena pimi plas manene laa, a pe lepamiema re si poli, kila narui yemalolo pañisi e yomarava wetelu.

<sup>13</sup> Nepisu manene ke sane, noñal pupia pepauña tai ka ke metava, suña mlolokai kar ke metava na, pisape “Yo piowa rui e, ana na nene naga kulus ke na wa. Navisi la telu asike ga wa, la kiela kumasua miyelu ñarera manene laa sane. Kam na yomarava, avisuar amiu, pupia na loge viowaena pimi ñaliv ke narui!”

## 9

*Kumasua na lima miyelu: pulus naña pito manene laa tano, naña na ñesia na loge viowaena ñarera na telu*

<sup>1</sup> Yoko navisi na lima miyu kiena kumasua. Nanene kila verue tañena kirir ñalia ñarpoyo ma e sinapane pitomi e yomarava. Verue nene, amla ki tai pania, nanene ki naña vietavan pulus naña pito tol kap naña garo tano.

<sup>2</sup> Pogos naña mlalua keplamaran pulus nene, kapi piu ñar wowo yo molmolue ke ea, sa naña pupia kap tai piu, ana pa kar ga meta e sinapane, kilawo maran mrae, kila yemalo ke sina ga.

<sup>3</sup> Ana pogos naña kap piu kalo make yo sanene, kelsisi la amolue apitom tano e porotano, ana pe asa re si kelsisi poli ana apim sa naña pupia kimi natano.



<sup>4</sup> Apisaluřar la asape ve atol re purlaki lala a kinanena lala pona sur la nařa pitotovi sike e yomarava, ana atańan asape akilia akila viowa va yeririna na yomarava lala, la nařa pe ařar re totou kiena ne Ntewa nařa naga mligan sike nena e piamenana ne kiena yeririna lala.

<sup>5</sup> Kimi na tano la nene, pe atańan la re nařa akilia awe mońar yar la poli, ana atańan la ga ayuyur la mńa va tol kupario ve lima. Ana pogos nařa akila mńa sanene vano-o, yoko yar la aloge yepela la lalae kar vano vařisi.

<sup>6</sup> E pogos nene, la ve moki na asave popon amarmare ga, yoko akale mrapa la nařa amare ea, ana yoko marena yepen mavin la, ligan la asuńa ga sanene.

<sup>7</sup> Ana kelsisi la nene, pogos nařa nepisu ruru la, atorokin wosi la nařa yar namara la akus ke ne. Amyen karo nařarila nařa pe kol suwo řarila, a pogos nařa nepisu ruru marala, nemilan la ga asa ga yaru.

<sup>8</sup> Ańe vilřarila sane sira, ana maluela lala, sane na maluena laion.

<sup>9</sup> Amyenwo yerela lala e pototo, a pogos nařa akaka tetai, kupela la kakapur mńalia sa nařa wosi la nařa ařere kiela kat lala akiriri ava akila mara.

<sup>10</sup> Kelsisi la nene kesila sike e la, a sur na yuren yaru lala sike e la, nařa akilia ayur mńa yar vano-o tol kupario ve lima.

<sup>11</sup> La kiela řarin suře tai, naga navisi tai, ana pe navisi kiena ne Ntewa re poli, naga navisi nařa pisuar ke mratava na pulukapi. Yar nene, kiena kia e visena kiena le Epru lala, asikia asape

Apatono, a e visena nae Krik, asikia Apoliono, kinas nen kia lua nene asape yar na warnena kareen suria.

<sup>12</sup> Kelsisi ne la nanene, naña nasumo e naloge viowaena la telu nena nanene. Noñal naga ãaro pa rui, ana lua sike ga wa.

*Kumasua na orai miyelu: navisi lala na weñaren yaru, naña nalua na naloge viowaena ñarera na telu nene*

<sup>13</sup> Yoko navisi na orai miyu kiena kumasua, nemloge visena tai molue kom e mrapun wonta wa nene varoka naña amiyuñæn e kol naña sike e yo wa vamon Ntewa.

<sup>14</sup> Visena naña pisa pa navisi nene sanini, sape “Navisi la vari naña apiar la asike e yo naña wii mlau ke ea naña kiena kia Yupretes, nagane kana pogos naña ova okila plan la sina avavano narui.”

<sup>15</sup> Navisi la nene, apuarar la ruru asuñña sanene pano-o tol nena kana aora na kana legiena na kana kupario, naña akilia amolue ea vena akila kiela yuññaena. Ana navisi tañena pa mlupar plan la, kila sane amolue apano, apa kar ga e purvanua lala añe yar lala lavis tol kompas nen yeririna na yomarava.

<sup>16</sup> Apa amio kiela yar namara lala naña akus wosi namara lala, ana nemloge apisawal kana marana tol tenario tol ponotia lua [200,000,000].

<sup>17</sup> A pogos naña nepisu manene wosi la nene amio yar la naña akusia, noñal pototo sur tai naña amligan mono ke yerela, amiyowa ruru la apivavaga sane kapi, amemaena sane lowe memaena, amleleru sane mrae. Kiela wosi lala

ape taĥena ga, naĥa ĥarila sa ga laion, a pogos naĥa amiyuveve nomal kapi a mĥau a posnoyavi na kapiapo mleleru molue petan logola.

<sup>18</sup> Sur la telu ne nanene, sane kapi a mĥau a posnoyavi na kapiapo kila lavis yeririna na yomarava nini la komĥas akokovio e pogos nene.

<sup>19</sup> Namareraena kien wosi la nene sike e ya naĥa molue ke kome logola, a sike mĥena e kesila lala, komin kesila la pilolon sane lomara, a sur sane ĥarin lomara mĥena sike e luas nen kesila naĥa mla ke pupia magka pa yeririna lala.

<sup>20</sup> Napiowaena la ne mĥarera paĥisi sanene, a pupia komĥas nen yeririna lala, nane laĥas naĥa amal ke na wa, pe asitom re poli. Pe apulon la re nena e kiela napiowaena la naĥa akila ke e limala poli, ana asumĥa akila luen ga lotena pa yermare lala, a asumĥa akila ke leniena pa nono lala na kiela ntewa lala, naĥa pe akirava re poli, a pe amloge kilale re sur poli, naĥa pe amiyal re poli, naĥa yar ga la amiyumĥaen e kol, pona selpa, pona pototo, pona kilavaru, pona laki.

<sup>21</sup> A amio mĥena nanini, pe apulon la re nenaga e ĥelaga na weĥaren yaru poli, pona kimi lala, pona nakilaen viowa amio sira, pona e kiela vinauena la naĥa asumĥa akila ke ne.

## 10

### *Navisi tai mlarar narin tus naĥa apilonaria*

<sup>1</sup> Ana siraunia, nepisu si navisi mĥarera taĥena molue ma e peni pitomi tano. Naga mien lul sa naĥa mĥana kulsota, a kuperierier miervivi

řarina, marana mřena ga sane mrae, ana lana luwoka sane pupia kemraře ana ape kapi.

<sup>2</sup> Ana nepisu naga tarar ke narin tus tai, nařa pike řa teke e limana luwoka. Ana piařereren lana marua piawa ke e sive a lana mřel piawa ke e porotano.

<sup>3</sup> Naga suřalar ga suřa sanene, ana mligan pupia vioena tai nařa sa ga laion, a pogos nařa naga kila, polilu make kar ga lala apisataře pimi, apis kome kiela mumuena lala.

<sup>4</sup> Pogos nařa polilu la atera sanene, sineun nesape nesiri plan kiela visena lala, ana lavis nekila narui, visena tařena molue ma e peni pitomi pan inu, sape "Toko, ve osiri re visena kiena ne la nene. Sur la nařa apisa, pe nakilaen re yeririna la akilia poli."

<sup>5</sup> Visena nene sanini, ana nořal ga navisi nařa piawa e sive amio porotano, kian limana marua pa ma e peni.

<sup>6</sup> Ana pisa kiena visena mřarera tai, pisaar e kia kien naga nařa mal sulue, nařa sii peni amio ya la nařa asike ea, amio yomarava a ya la nařa asike ea, amio sive a ya la nařa asike ea. Kiena visena pa sanini, sape "Nagane pe pogos na suřateen re si poli!"

<sup>7</sup> Lavis ke navisi na olua nene yu kiena kumasua narui, a visae kila ga rui, vera na nasitomwanena kiena ne Ntewa la imi mřalivi rui, vera na sur make ga imi merarava ve sa ga nařa naga pisawal řesan pa navisawalen la nařa amiyuřae kiena řesa."

<sup>8</sup> Pisa pa sanene narui, in mřena nemloge visen tařena molue ma e peni pitomi pan inu, sape

“Narin tus naŕa pike teke e limana ne navisi naŕa suñal sike e sive a porotano, ova ola ke ne wa.”

<sup>9</sup> Ana nepa lavisin navisi naŕani, nepiun narin tus nene tania. Ana tañan ga pan inu, sape “Poga, okilia olavia. Visae olavia monar okania. A nesape nevisa van ko sanini, pogos naŕa okania, yoko ologe kiki e logomña vaŕisi, ana siraunia, yoko ologe melkalka e mopomña.”

<sup>10</sup> Ana nemlavia nakania, ana kiki e gou paŕisi. Ana nesinom pae, ana sanena naŕa pisa, naŕa sur nene melkalka, kila kare mẽpeu paŕisi.

<sup>11</sup> Yoko, visena pitomi si pan inu yam tai, sape “Yoko ve sa ga nene narui, komin navisawalena taŕena la asike ga wa naŕa yoko monar oto ovisawal sina, naŕa apisayu ãegas nen yolai lala, purvanua punu ga, yaru na visena taŕena la punu ga, a ãarin suŕe la naŕa asike e yomarava.”

## 11

### *Yar la lua na iilaaren visen kiena ne Ntewa*

<sup>1</sup> Ana e pogos nene amligan kiai tai te lumñau, asape neva nela totou na yo la ea. Asape, “Ova e yuñna wa mñana Ntewa, ola ruru kana totounena na keviu pa sanape, a ola totou na wonta naŕa sike loyuñna ea, a oulo mñena yeririna la naŕa akila ke lotena e yo nene, sane mña tol via.

<sup>2</sup> Ana kana pupia yo naŕa mẽke vanua, naga ve ola re kana totounena, komin yuñna wa nene komŕasa yar la naŕa pe ape Yu re poli la yoko akusia. Wolawa la nene yoko aim ataulu pupia

kumali wa nene Yerusalem, yoko aim loyũa ayalor kar ga ea sa naña la lelela, ana yoko akila ga va tol kupario ve lualima yam vari va lua [42].

<sup>3</sup> A pogos naña asike e nene, yoko yar lalua naña asumal m̃arera asike e kiau visen lelaga aim añalivi. Lalua ayen ga kulupak sa naña m̃ala kulsota, a yoko avisawal kiau visena e siarena na kupario la nene va tol luasa, naña kana legiena nena tol manu ve taaga ponotia ve lua lualima yam orai [1260].”

<sup>4</sup> Yar lalua nene visena wa kiena ne Ntewa pisayu la nakonua rui, naña pisayu sape purolip lalua asuũa ga, pona naña pisayu kemrañe na kantel lua, naña luoka ga asm̃al asike e marana ne kieta Ntewa naña naga pe suñen yomarava wetelu.

<sup>5</sup> A visae yar tai kilali naña kila viowa va lalua nene pogos tai, yoko kapi kilia molue e logola, yoko kilia kilapel ruru nena kiela nasinekar lala. Nane mrapa ne nanene naña visae yar sinenan sape kilam̃ar la, yoko naga ga kan ke sina kiena marena narui.

<sup>6</sup> Lalua nene kiela nam̃areraena keviu liu, naña akilia akilawo sinapane metava vena yua tañatete kove e pogos naña apisawal visena kiena ne Ntewa, a akilia akila wii lala imi ve kuruta, a akilia akila naña sur viowa kar ga imi pona pogos m̃arera imi kila kare yomarava e pogos ya naña lalua asitom asape akila.

<sup>7</sup> Ana lalua nene, lalua ave navisawalen sanene vano tol pogos naña lalua akila yuũaena na sanene ãisi. E pog nene narui, yoko pupia

sur mal viowa naña ñeke tano e pulukapi molue vamin lalua, a yoko kiena ñañareraena taulu la luwoka, kilañar la.

<sup>8</sup> A yoko akoven tasnela ñeke likan mrapplepa e pupia pulkumali naña naga pulkumali ña nena naña kiela suñe naga ñena añaña meta e lak torovia. E nene, naña e ñelaga na visawanen suria, apisa kia na kumali nañani, pogos tai asape kia na kumali marua viowa naña Sotom, pona apio asape Isip.

<sup>9</sup> Tasnela moña ga e yepisun sanene yoko ñegas nen yeririna lala, pona lus lala, pona visena lala, pona purvanua la aim avisu la, yoko avisalupar la ve asinla re vano-o tol legien ve telu komsusa.

<sup>10</sup> A pogos naña apisusu ña tasnela yar mare lua nene pano-o yoko apisa karela pañisi a apitalia kare la ñisa. Yoko asitoñal naloge viowaena lala naña navisawalena lalua akila pimi pa yar na yomarava lala, ana yoko akekara na akekaran naña lalua nene amare pa rui, yoko akila pupia ñañagena a yoko awarwar si nalaena lala van la vanonia.

<sup>11</sup> A pogos naña legiena telu nene komsusa ñaro pae, pe asin re luwoka poli wa, la amilan ga lagi na malena tai molue kome Ntewa pitomi tol maren lua naña ne, kila si la ga luwoka asuñal añañarla asuñal asikena. Pogos naña yar la apisuia, amarau na amarau,

<sup>12</sup> a pe yam piavi re poli, amloge pupia visena la kom ma e peni pitomi, pisa pan lalua, sape “Poga, amlua avam metava narui.” Ana la ga luwoka apa metava veraga, akus lul lala apa atol

ma e peni, naña kiela nasinekar lala apisu sane asuñalu wowe ga asikena, logola suwowo ga rui apis re si poli.

<sup>13</sup> A e ke e pogos nene, pupia yem-ninu, naña kila lepas nen pul kumali nene komņas, yuña make ga akekapil apororowa make nenaga, a yeririna la naña amarmare e yemninu nene tol manu olua. La naña amal ruru ga asuñaga la apisu ke sur nene, amarau kar ñan wa, ana apisu sane popon la ayeluar ga Ntewa nae peni komin kiena pupia ñareraena naña la apisu kilale ga na wa.

<sup>14</sup> Yemninu nene sur sane pupia naloge viowaena na lua ñaro narui, kana yam telu nena pere wa, yoko naga ve ve piavi re na imi.

*Kumasua na olua mielu: pogos na liñereena, naña kana naloge viowaena ñarera maro na teloka nanene*

<sup>15</sup> Yoko navisi na telu miyu kiena kumasua. Nanene narui kila pulgo la moki apisasawal ke pupia visena la ma e peni, amieluar Ntewa apisa sanini, asape

“Nagane narui yo punu ga naña sumo sike vatanon suñe viowa na yomarava nini, la asike vatanon kieta Suñe Ntewa narui, lalua kiena Navisaarena, a yoko naga ve ñarin suñen vano-o tañatete ñisi pogos tai.”

<sup>16</sup> A nasumonena ñena la lualima yam lua pa vari [24] amio la, naña atotano ateke e lelela



la naña pa metava, akinai tano vamon Ntewa, amlotunia,

<sup>17</sup> asape

“O Ntewa keviu namareraena na mava, ko naña osu nakonua rui, ko naña osike nagane, ko naña ope na pogos la ne pimi ke ne.

Mepisa potena pan ko pañisi wa, komin naña oñarar kioña pupia m̄areraena rui, nagane narui osuñalu m̄arera e kioña nasuñenena.

<sup>18</sup> Purvanua make ga na yomarava nini sumo na sinela kar ko, ana pogos na kilologiaen kioña sinekar van la narui.

Nagane kana pogos naña yoko oliñere yar mare lala, a yoko okila kare yeririna la naña akila kare kioña yomarava.

Ana kioña yar na yuñena lala, naña navisawalena lala, amio kioña li nalelagaena wa lala, a la naña apatanon ke kioña kia, yoko awar kiela nalaena wo la e pogos nene, pe sur koren ga naña ape yerkawa lala e kioña yuñena, pona pe ape yerkawa re poli.”

<sup>19</sup> Ana e pogos nene apietavan yuñ wa m̄ana Ntewa ma e peni e marana yeririna lala, a añal pias nen navisaluaena wa mon m̄aga. Amilan ga yo pe tañena veraga, komin namareraena kiana ne Ntewa sike ea, naña yekarpla e yo punu ga, amio polilu tera, yo m̄aaga, yemninu, a pupia mras nen yua aes kekapili.

## 12

### *Sira nowo amio pupia nopi tai*

<sup>1</sup> Nepisu manene ke sur nae peni lala wa, ana nemilan ga pupia kile tai. Naga sira tai, naga kus mrae, mien pe m̃ana kulsota, suṃal sike e kupario, a karo na p̃arina, verue lualima taaga pa lua [12] sike ea.

<sup>2</sup> Sira nene m̃eṃena, ana mloge piowa mlokai na mlokai, komin kiena kupario p̃isi narui, lavis waria.

<sup>3</sup> Nepisu manene m̃a sanene, pupia surmali taṃena molue ma e peni, naga pe namarauena manene laa. Naga pupia arman nopi tai, pivaga, p̃arin olua naṃa amien karo na p̃arin suṃe olua sike e la, a laṃaliu m̃ena sike e p̃arila, make ga tol lualima.

<sup>4</sup> Ana noṃal ga sur naṃa kuṃin kesina sane, ku plan verue la mokliu akekapil akowowo yo tano e yomarava. Ana sur viowa naṃani pimi suṃalar se maran sira nene, naga sitom ruru rui sape sa sira nene war sisi, karm̃ar ke veraga.

<sup>5</sup> Suṃa sanene pano-o sira naṃa p̃arlua narina, pe yerm̃ene. Ana Ntewa sinenan sape sisi nene imi ve p̃arin suṃe vena uarar pototo e limana vena ve suṃen yeririna na yomarava lala, ana pogos naṃa sur mal viowa nene pe tol re sisi nene poli wa, ana akuslua veraga, akuslua pa ma puna ne Ntewa m̃ae kiena pupia lele na totanoena.

<sup>6</sup> Ana sira nene marau, pure pa tapolou e yomema, e yo tai naṃa Ntewa kila ruru pe lelana, ana pa tapolou e yo nene, apisuar ruru naga e

legiena moki, legiena tol manu taaga ponotia lua lualima pa orai [1,260].

<sup>7</sup> Ana e pogos nene pupia mara tai kapur ma e peni. Par navisi nene Maikel amio kiena navisi lala, akila mara amio pupia nopi nařani, ana naga mřena ga amio kiena navisi lala akila mara mřarera pařisi pan la.

<sup>8</sup> Akila mřa mara sanene pano-o, tol nařa nopi nene, kiena namřareraena řisi, ana amio kiena navisi lala amloru apito tano. Ana akila kare la pařisi, amla nakoarena pan la, ařar plan lelela ma e peni petan la.

<sup>9</sup> Ana pupia nopi nařani, akovenlua nena ma e peni veraga pitomi e yomarava, naga amio kiena navisi lala.

Ana e poglis nene nepisu kilale ga pupia arman nopi nene na wa, naga ke ga nařa kus maran lořara nanua sumo narui, naga yar sur nařa asape Yermare, pona Yermare Lego, nařa nanagane naga ke na wa, naga řere yomarava nini wetelu kupal ke mrapa silaga.

<sup>10</sup> Ana siraunia, nemloge pulgo tai pio řar make yo ma e peni, sape

“Nagane na natamaliaena kiena ne Ntewa sumřalu,

puriukawaena kiena ne Ntewa tauluia,

nasuřenena kiena ne Ntewa pimi mřalivi,

namřareraena kiena ne kiena Navisaarena pimi mřalivi, mon metavan make suria.

Yar viowa nene nařa sumřa pisa kare mratava puna Yesu, akovenlua naga rui.

Legiena a lemalo suñal ga sike e marana Ntewa  
kilali naña visawal mlamulen viowa kiena  
ne yeririna lala,

ana nagane narui, akovenlua naga rui.

<sup>11</sup> Nalelagaena la mokliu naña pe asitom re si  
kiela malena la poli,

pe amaraun re si marena poli,

ana la asñal m̄arera m̄a pano-o ataulu yar viowa  
nañani,

a ya naña la apuarar ke e limala vena akila mara  
amio,

naga kuruta kana Narin Sipsip ga, amio visena  
lala navisawalen kiela lelagaena e Yesu.

<sup>12</sup> Ataulu yar viowa nene rui, sane nagane ma e  
peni, amio la make naña asike ea, akilia  
akekara na akekara,

ana la naña asike e yomarava pona sive, amloge  
piowa a monar amarau,

komin Yermare pito tano sike likan la amio sine-  
mimiena naña pule manene laa, komin  
naga kilia sape kiena pogos plas ga teke  
na, lavis naga p̄isi narui, ana sirag manene  
laa.”

<sup>13</sup> Visena nene yar tai pisawal ma e peni,  
nemloge pae, p̄isi na nomal nopi nene pisu kilale  
naña akovenlua naga pito tano e yomarava, ana  
sinena mimi laa narui, naga pisaar m̄arera sape  
yoko monar tol sira naña p̄armare ga narina na  
yermene nene na wa.

<sup>14</sup> Naga pa m̄areran si pa sira nañani, ana  
milan ga amligan kupen lua pa sira nañani, sa  
naña kupen pepaum̄a, vena ka va tapolou e yo tai  
e yomema naña akila ruru pa rui vena avisuar

naga ea. Naga pa sanene narui pupia nopi nene tařatete si tol naga e yo nene, asape yoko naga sike e yo nene pogos ve piavi towe m̃aga nařa kas tai, siraunia kas ve lua, řisi komsus nen kas si tai.

<sup>15</sup> Ana nopi nařani pisu sira ka pano, naga kilia ga sape tařatete si va war po yo, naga sinen mimi laa narui, plamolue mliluan pupia womie tai vena werelua sira nene va talilunia.

<sup>16</sup> Pupia wii nene mlau pano, lavis tol sira nařani, ana amilan ga yomarava sinen miye sira nařani, miila naga nařa porotano purřa veraga pikepaia sa nařa pupia logona, sinomlaun ga wii nařa nopi nene mliluania.

<sup>17</sup> Nopi pisu narui, nagane kiena sinemimiena pimi piowa laa narui, ana mligan sira nařa sike na, sape vanon ga narina tařena lala, nane yeririna la nařa asum̃a ataveve ke navisaluaena kiena ne Ntewa, sane la nařa apuarar ke visena kiena ne Yesu m̃arera.

<sup>18</sup> Pisa pa sanene narui, pano amio kiena pupia sinemimiena, panon kila mara amio tařena la nene.

## 13

*Surmal viowa řesa, nařa molue e sive, nopi mla nam̃areraena pania*

<sup>1</sup> Pupia nopi mialoro pitove, sum̃al sike yepas nen sive. Ana pe piavi re poli, nom̃al ga surmal tai molue e sive paminia. Yar nařani naga řarina olua, a kana lam̃aliu tol lualima, a e kana lam̃aliu la peve taaga karo wa na řarila kiena ne řarin

suṣe lala telan sike ea. A e piamenala la peve taaga, asiri kia tai sike e la, naṣa na viuelena nawarnena kareen Ntewa.

<sup>2</sup> Surmal nene, noṃal pe taṣena ga, naga sane sape ve sa towe ṃa laion, komin logona sanena laion, ana lana varoka sane lana surmal taṣena naṣa pea. Ana naga pimi suṃalu sike e nopi naṣani, a nopi mla puriukawa pania, kila naga pe ṣarin suṣe e kiena lepasa, taṃan naṃareraena make ga pania.

<sup>3</sup> Ana nepisu veve ruru surmal naṣani amio ṣarina lala, noṃal ṣarin tai pupia piakapila na magka tai ṃeke ea, keviu paṣisi. Pogos naṣa ṣar magka nene, naga pe na marena ga, ana yar na yomarava la amilan ga naṣa akila ruru pimi ṃao sina, ana kila narui apilon kiela sitomena lala apim amlelaga e yar mal nene, ataveve ke naga.

<sup>4</sup> Sanene, la akekaran manene laa surmali nene, ana pogos naṣa apisu nopi mla naṃareraena pania vena imi ṃarera manene laa, akekaran paṣisi, amlotun nopi, a amlotun yar mal nene naṣa suṃa sumon la. Apisa sanini, asape “Ane kilia taulu kieta yar mal na kilaen mara nene pogos tai? Nagane pe yar re si tai naṣa ṃarera manene torokin naga poli.”

<sup>5</sup> Ana pogos naṣa yar mali nene pimi ṃarera ruru sanene, siar vena kila kiena napiowaena lala. Naga suṃa kila ke kiena visena na vilaveena lala, suṃa piuel kar ga, a suṃa miyuṃae ke amio kiena naṃareraena viowa, a kila ṃa pano tol kupario lualima yam vari pa lua [42], sane kas telu komsusa.

<sup>6</sup> E pogos nene, naga suña ãarnena kare Ntewa, piuelin ke kiena kia, a suña koven ke visena viowa pan peni amio yar wa la naãa asike ea.

<sup>7</sup> Puriukawa naãa amla pania, torokin naga kila mara va va nalelagaena wa lala, vano-o kilia taulu la, a naãareraena naãa naga ãar ke na, torokin naãa naga ve suãen yolai make ga, yeririna make ga, visena make ga, amio purvanua make ga.

<sup>8</sup> Naga kilia ve suãe ãa sanene vano-o yar make ga na yomarava nini yoko avatanonia, ana laãasa yoko taãatete avatanonia, a naga nene la ga naãa siar e nasiiena yomarava pimi, kiela kia asiriar sike loyuma e tus na malena kiena ne narin sipsip naãa aãeãaria.

<sup>9</sup> Ko naãa visae ologe visena la nene, visae kiligaãa toãa ga, popon ologe kilale ruruia.

<sup>10</sup> Nalelagaena naãa vena akusvinaun ga e kiena purvanua vena va yumaãe kiela, naga yoko monar va ga narui. A naga naãa na teluaen kolmekina e playu na kilaen mara, ee, yoko playu na kilaen mara monar te ga kolmekina narui. Visae pogos ãarera tai sanene, yoko li nalelagaena wa lala monar asumaãal ãarera amio kiela sitomena viayavi lala, monar amasisu ãa vano-o awar ro ea ava atol luasa.

*Sur mali viowa na lua, naãa molue e porotano*

<sup>11</sup> Ana siraunia nepisu ke sina ga sur mal viowa taãena tai, naga molue e porotano pam. Naga kana laãaliu na ãarina lua ga, sa ga narin sipsip tai, ana pogos naãa pis, pulgona sa ga nopi naãa sumo.

<sup>12</sup> Ana surmal na sumo tañan na lua nena yuñae amio kiena nañareraena m̃arera make ga, naga kila m̃a pano-o yomarava amio kiena yeririna make ga la amlotun surmali na sumo nañani, naña p̃ar pupia magka na marena ga yoko m̃ao sina.

<sup>13</sup> Ana na lua nene asuñã akila ke pupia kile lala amio pupia sur na ilanen lala, pano-o akila tai naña kap molue ke ma e peni pitom e yomarava e maran yar la naña apisu ke ne.

<sup>14</sup> Ana e kile la nene naña naga kila ke ne e kia kiena ne sur mal na sumo, naga suñã pisa kotalia ke yeririna na yomarava lala, p̃ere la apa ape wowe laa narui.

Naga pisawal pan la sape ate nono kiena ne surmal nene, naña playu sia ana mal si moñã ga.

<sup>15</sup> Ana amiyuñãen pae, amla m̃areraena pan surmali na lua vena kila nono nene kilia yuveve, akilia vis, a amla m̃areraena pania vena kilia weñar yar ai naña pe kekaran re vatanon naña lotun nono nene poli.

<sup>16</sup> A amio m̃ena nanini, naga m̃areran make la ga vena awe tatu se limala marua, visae peraga, e piamenala. Yaru kar ga lala amio yerkaña lala, a la naña limala korena ga amio la naña limala pule, a yar la naña amiyuñãe, amio kiela nasumonena lala, la make ga awar tatu nene.

<sup>17</sup> Visae tatu nene ve su re e la, tañatete aul sur tai e yuñã na wilwiliena, a tañatete awilwilin sur tai va yar tañena.

Tatu nene naña awe se e la, molue kome kia kiena ne surmali nene, naga marana na kiena



kia.

<sup>18</sup> Ko naña oulo tus nini monar omanmarua ruru e yo nene. Visae ovisu kilale make suria, yoko okilia olual marana na kia kiena ne yaru lala, ana apuloviraviran marana na kia na sur-mali nene, añal tol lualima yam orai pa orai, pona sa naña lañasa asape, orai orai orai [666].

## 14

*Narin Sipsip amio la naña atol manu yam ponotia taaga lualima yam vari pa vari [144,000]*

<sup>1</sup> Nekira ke sina pa yam tai, nomal tavie nae Saeon mēke ga vamon inu, a ma e luasa nomal Narin Sipsip sumal sike ea, naga amio kiena pupia pīna na yeririna tai. La asiri kiena kia amio kia kiena ne arimana Ntewa sike e piamenala, a la moki paḡisi, kana marana tol manu yam ponotia taaga lualima yam vari pa vari [144,000].

<sup>2</sup> Ana pupia māagena tai kom ma e peni pitomi, taulu naña sive pānpo e piame pona polilu tera. Ana nemiagogonia, nemloge ga naña añe kita la amiyelu,

<sup>3</sup> a la asumal asike vamon yo wa, e marana ne yar mal la vari nene amio nasumonena lala, amiyaun ke yauena viu tai. La taḡena la mokliu naña akekaran yauena nene paḡisi, la sinelan mēna asape ayaunia, ana akilayon pēlea. La ga naña akilia ayaunia, nane pīna na manu yam ponotia taaga lualima yam vari pa vari nene, naña apul plan la petan yomarava rui.

<sup>4</sup> La ke naþa pe akilali re piowa amio sira yam tai poli. La apuarar ruru kiela malena meki ruru po silaga, a ataveve ke Narin Sipsip nene va e yo nape naþa naga va ea. Yeririna la mokliu naþa asike ne, ana la ke naþa apul plan la petan taþena la narui, a la akilala apim sane mras þesa nalaena va Ntewa amio Narin Sipsip.

<sup>5</sup> La nene pe visokanen re tai molue kome logola poli, pe sur viowa re nena tai sike e kiela malena poli.

### *Navisi la telu*

<sup>6</sup> Ana e poglis nene, noñal navisi tai moña kaka ke e yo punu ga ma metava. Amla lologena wo naþa ve uro re pania, vena naga kilia va lologon va e yo punu ga va yeririna na yomarava lala, vena va tol purvanua make ga, yolai make ga, a visena make ga.

<sup>7</sup> Naga pisawal ke pa e yo punu ga amio pulgona naþa keviu, sape  
 “Amiu avatanon Ntewa,  
 avisirlua kiena kia,  
 komin naþa kiena aora na liþereen yomarava  
 mñalivi rui.  
 Alotun naga naþa sii sinapane, yomarava, a sive  
 amio purþes nen wii lala.”

<sup>8</sup> Ana siraun na nene, navisi nalua taveve pimi naþa naga piozion ke sape  
 “Pupia pulkumali viowa naþa Þapilon naga mlor  
 rui!  
 Naga pa mla ntewa naþa pe pe lelaga re poli, a  
 þere plan yeririna mokliu naþa apa ape

wowe amio, la sa ga yar na ve torogen ga lala.

Nanagane, pupia pulkumali nene pimi piowa rui amio kiena nono lala.”

<sup>9</sup> A yam si tai, navisi na telu taveve la pimi, pisawal manenea sape “Yoko yar la ve moki naña akinai vena alotun yar mali viowa amio kiena nono, a yoko yar la ve moki naña atamān awe kiena tatu se piamenala pona limala.

<sup>10</sup> Ana yar naña kila sanene, yoko naga mēna ga mun e piala naña pulen kuruta namunena naña melkalka na pupia sine-mimiena kiena ne Ntewa. Yar na sanene, mapulukapi luamene lege kare tasnena e marana navisi wa lala a e marana Narin Sipsip.

<sup>11</sup> Ponoyomē na kiela naloge viowaena yoko molue lue e kapi naña tařatete mare pog tai. La naña amlotun ke Sur mal Viowa, apatanon kiena nono, amio la naña ařar ke tatu na kiena kia e tasnela, la tařatete atol yo wo na va ruru laena, ana yoko ayumāen ga loge viowaena ko legiena a kolemalu nalue ga narui.”

<sup>12</sup> Nakoena nini naña navisi pisa mārera pařisi, ana kana kinasa sape ita li nalelagaena wa lala monar tesumālu mārera temio kieta sitomena viayavi. Monar telogear navisaluaena lala kiena ne Ntewa, a silaga monar teve lelaga e Yesu.

<sup>13</sup> Ana nemloge visena tai molue ma e peni, sape “Nanene visena tai naña yoko osirilua, naña sape, siar nagane vano, la naña yoko amare,

naña kiela malena su ruru sike e limana Suþe rui, yoko awar pupia navisa ruruena.”

Visena nene þisi, ana nemloge Ninuna tañania, sape “Ee, la nene yoko kiela yuñæna wo la avam metava amio la, a nagane yoko taþatete si ayuñæ narui, la atol kiela navaruruena wo rui.”

*Navisi la telu apito aþar kinanena naña marua e yomarava nini*

<sup>14</sup> Nekira si pano, ana lul yuwowo tai mñeke ga vamon inu, ana nomal yar tai, sane Narin Yeririna, totano teke e lul nene rui. Totano teke amio karo na þarila kiena ne þarin suþe lala e þarina, naña amiyuñæen e kol, a e limana tarar ke uknaep tai naña mal paþisi vena teen kras nen kinanena lala.

<sup>15</sup> Ana navisi taþena molue e yuñæ wa, pio ke naña teke tano e wos nen lul nene, sape “Poga, osuñalu, otar kioñæ playu ova osiar yuñæna. Kinanena la naña sike e yomarava amarmarua rui, nagane pogos na teen narui.”

<sup>16</sup> Ana naña teke tano e lul suñalu, silin kiena playu pa e yo kar ga e yomarava, te kinanena la naña marua sike ea.

<sup>17</sup> Ana navisi taþena molue e yuñæ wa ma e peni, naña naga mñena þarar ke kiena playu naña pe uk, naga mñena mal na mal.

<sup>18</sup> Ana navisi ke sina tai pitomi, naga naña pe navisuaren pulukapi, ana naga þaro e wonta pimi pio taþena naña mlarar ke playu, sape “Pogaga, ko mñena ga, pogos naña oto okila kioñæ narui. Otar kioñæ playu oto owar punu kilis nen

kerep la nene teliv e yomarava nini viora, ote polo mras la naña marua telan sike e kilisa.”

<sup>19</sup> Ana navisi naña mloge, teran kiena playu e yomarava, pito ãarpolo mras nen kilkerep e yomarava, koven la e lele na winplanen was nela naña asike vanua e pulkumali.

<sup>20</sup> Ana nasinemimiena kiena ne Ntewa kilapel la ga, pumumu kare la pano-o kuruta mlau ãarpoyo, mlau pimi keviu sa ga womie, kokonia make purvanua wetelu merorol pa tol kolmekin yaru, pano pano kilamarala plasania.

## 15

### *Navisi olua amio pog viowa maro olua*

<sup>1</sup> Nepisuveve ke sur la ma e peni wa, ana pe yam piavi re poli wa nepisu pupia kile tañena naña pe pupia sur na ilanena pañisi, nane navisi la olua, naña la añar maron pog viowa la olua. La maro sanene komin naña visae la awar ro pae, nane kila sane pupia nasinemimiena kiena ne Ntewa yoko ãisi ruru nenaga.

<sup>2</sup> Ana nomal pupia yotop tai, meri ga pano ñeke na sa ga sive, ana naga kap ñeke ea, ana pila na pila. Ana e lepas nen yo nene, nepisu yar la mokliu asumal asike ea, a la nene, naga yeririna make la naña ataulu yar tetan, la ataulu kiena namareraena, a la ataulu puriukawa na marana na tatu naña aña sike ea, naña yar nene ãaria sane kiena kia nowo tai.

La naña atauluia, asumalu asike amio kiela kita lala naña Ntewa ãar pan la,

<sup>3</sup> ana asuñña aña ke kita la nañani, la asuñña amiyaun ke kiela yauena tai naña yauena kiena ne yar na yuññaena kiena ne Ntewa naña Navisawalena Mosis, ana nagane pimi naña apio asape yauena kiena ne Narin Sipsip. Yauena nene pa sanini, sape

“Akee Ata Ntewa na Mareraena  
kiomña yuññaena la akerkeviu pañisi, apowo  
pañisi, ko ope Āarin Suñe kiena pog make  
ga, kiomña ðelaga la mesmesu a ape lelaga.

<sup>4</sup> Ko ope Suñe, pe yar re nena tai naña ve maraun ko re.

Pe yar re nena tai poli naña ve vatanon re kiomña kia.

Ko ga ope na wa kemua lelaga,  
ana yolai make ga monar akinai tano alotun ko,  
komin nagane, sur mesmes la naña ko okila, lala  
añaliv apim amerarava ruru e kilamaran  
yeririna na yomarava la rui.”

<sup>5</sup> Pisi na nekira ke sina ga pa loyuñña ma e peni ana nomñal pulutava na yuñña wa lala suwowo ga sike na. Nepisu sane silparpara na tapolen nena nanua sumo akutarar kome yomema pimi, naña amligan ruru navisaluaena kiena ne Ntewa sike ea.

<sup>6</sup> Apike pae, ana navisi la olua amolue ea. La amiyen kulmrae urmi la naña amekik ruru po, apilavila, a atelan kulka naña amiyuññaen e kol ðaro e yerela. Ana amial apim, amio pog viowa olua naña añar ke ne.

<sup>7</sup> La apim asuññal asu narui yar mal la vari tai nene kian piala naña pe kol olua pan la, tai kus

tai, tai kus tai, naþa apulen ga nasinekar kiena ne kieta Ntewa naþa sulue na sike ne.

<sup>8</sup> La akuspae, ana komin pupia naurarena na namareraena kiena ne Ntewa sike e yuþa wa nene, kapiu þar punu yo paþisi, kila yar taþatete va loyuþa. Ana suþa sanene pano-o tol naþa pogos viowa olua kiena ne navisi la olua nene þisi ruru nenaga.

## 16

*Pias nen nasinekar kiena ne Ntewa olua naþa puleule nenaga*

<sup>1</sup> Ana nemloge visena mþarera tai molue ma e peni pa pa navisi la olua nene, sape “Nagane, pogos na yuþae kiamiuena narui. Ataron plan pias nen nasinekar kiena ne kiamiu Ntewa veve taaga vito e yomarava.”

<sup>2</sup> Pisa pae, ana navisi na sumo pa taron plan kiena piasia pito e porotano, ana kana wii nena mlau pa kila magka wa la molmolue kalo tas nen yeririna la naþa aþe tatu na sur mal viowa sike e yepela, naþa la amlotun ke kiena nono, aþar kare magka pano-o þisa amloge sinelalaea pano-o paþisi.

<sup>3</sup> Yoko navisi na lua towe taron plan kiena piasia pito e sive, ana kana wii mlau pito tol sive kila pimi pe kuruta sane na yar mare, a sur mal la naþa sike ea amarmare make nenaga.

<sup>4</sup> Yoko navisi na telu taron kiena piasia pito e wii lala naþa amlau, þarar purþes nen wii lala, ana kana wii mlau pitove kila la mþena apim ape kuruta veraga.

<sup>5</sup> Ana nemloge visen tai pitomi e navisi nene naña pe þarun ke wii na yomarava lala, naga sape

“Ko na osike mña na konua rui, a osike nagane, ope Nawa,

kioña nakoarena la nene añarera manene laa, ana kioña naliþereena mesmes ga.

<sup>6</sup> Lelaga naña yar na yomarava lala, aņemoņar kioña yar wa lala, akila kuruta na kioña navisawalen la mlau, ana omla maran ke sina pan la pogaga, naña mñala wii namunena ape kuruta make ga.”

<sup>7</sup> A visen taþena si molue mñena e wonta, sape “Ntewa na meta manenea, pe lelaga paþisi, kioña naliþereena lala amesmes ruru nenaga, ape lelaga paþisi.”

<sup>8</sup> Yoko navisi na vari taron plan kiena piasa pito e mrae, ana kana wii kila mrae yo pisun manene laa, kilia lege yeririna na yomarava la sane kapi.

<sup>9</sup> Ana amloge yepisusun, yepisun kekan la pano-o apiuelin kare kia kiena ne Ntewa paþisi. Akilia ke asape naga mligan ke nakoarena la nene pimi, akilia mña asape naga visae sinenania kilia visaluþaria, ana yepela mavin ga vilon laena, asape taþatete avatanon naga, a taþatete aieluar naga pog tai.

<sup>10</sup> Yoko navisi na lima taron plan kiena piasia pito e pupia lele na totanoena kiena ne sur mal viowa naþani, ana kana wii mlau pito kila lepas wetelu na kiena nasuþenena, yo malolo make nenaga. Yar la amloge piowagan nakoarena nene þisa, akarar purmenela la pano-o,



<sup>11</sup> apiuelin kare Ntewa nae peni komin kiela yepelalaea a kiela magka wa lala, ana apisalup̄ar ga, asape taṭatete nenaga avilopu la e kiela naviowaena.

<sup>12</sup> Yoko, navisi na orai taron plan kiena piasa pito e pupia wii naṭa mlau, kiena kia Yupretes, ana kana wii nena mlau pito ṭartaṭe wii naṭa mlau ke ne pimi mema nena ga. Nanene kila narui ṭarin suṭe na purvanua make lala na lepas naṭa mrae ṭarpo yo ke ea, pe kiela mrapa narui, vena waroen yo ea aimi amio kiela yar na mara lala.

<sup>13</sup> Ana nom̄al ninuna viowa telu naṭa sane prok, naṭa tai molue e logona pupia arman nopi, tai molue kome logona Surmal Viowa, a tai molue kome logona navisawalena na visokanena.

<sup>14</sup> La telu nene, ninuna ne yermare la telu naṭa asuṃa akila ke kile lala, a asuṃa aṭaro make puna ṭarin suṭe na purvanua lala na yomarava, aṭerela apim lele taaga vena akila ruru make suria komin pupia mara naṭa yoko kapur e pupia legiena maro naṭa Ntewa na mava pisaar rui. Ntewa pisayu legiena nene rui e kiena visena tai, naṭa sape

<sup>15</sup> “Avisuar amiu, yoko nom̄alivin amiu vinau ga, yoko ailan inu sa naṭa visae yar na vinauena tai imi.

Yar naṭa kon ruru kiena sur lala, naga su ruru ke narui, a tavolo ke ga wa, vena suṃate inu, vena imimi lua mevano, yoko wo van vaṭisi.

Ana yoko laḡasa ailan sane yepela ve sinas ga akiriri tetai, amawa vaḡisi e pogos nene.”

<sup>16</sup> Ana noḡal pog na mara na legiena maro pimi ḡarpoyo, a ninuna la nene aure ḡarin suḡe na yomarava la ava lele taaga, nane e yo naḡa visena na Epru sikia sape Amaketen.

<sup>17</sup> Yoko navisi na olua taron plan kiena piasa, ana taron plan ga pitomi metava e yepesinas na ḡeke ne. Ana visen tai molue kome yo wa na totanoena loyuma e yuma wa nae ma peni e pogos nene, pion manenea sape “Nagane pogos na luas nen sur make ga.”

<sup>18</sup> Ana yekarpla siar e yo punu ga veraga, ḡarar kana polilu ne la naḡa atera, a navioena lala a maagena lala. A ḡarar maena, pupia yemninu, yemninu ma pano-o pa piowa manene laa sa naḡa pe yar tai pisuli re yam tai poli wa, siar e naḡa yar mal e yomarava pimi tol nagane.

<sup>19</sup> Ana yemninu nene kilaḡa porotano, kila pulkumali lala na purvanua make ga teliv e yomarava nini piora amloloru, a kila pupia pulkumali naḡa Paḡilon purḡa lepas telu.

Ntewa suma sitoḡal ke yo nene, ḡarar kiena napiowaena lala, ana kila karepel manene paḡisi torokin nena kiena ḡelaga naḡa kilakila ke ne, kila naga mun e piala naḡa pulemamagan kuruta na munena na maḡeraena na kiena nasinekar.

<sup>20</sup> A ḡarar yemninu nene, narin purvanua la apureure apano akokovio, a tavie la nanua asmaḡal asu ne, amaḡal la re si poli.

<sup>21</sup> Aes yua la meta e sinapane amloloru sane

pupia kilavaru lala, a monar yeririna la naña asike e yomarava. Amloge manene laa pi-owagania, apisu naña sur viowa nene mārera manene laa, pano-o asuñña apisalele kare Ntewa.

## 17

### *Sira viowa teke tano e surmal viowa*

<sup>1-2</sup> Ana e pogos nene navisi tai pimi, naga na navisi la olua tai naña akus ke piawi piās olua nene. Naga pimi mesmesun in ga, pisawal sape “Otaveve inu. Yoko nekipian ko e pupia pulkumali viowa naña Pāpilon, naña mēke e naña pupia wii la mlau ke ea. Pulkumali nene miyuñae piowa ga, sa ga sira na mrapa tai. Naga sa ga p̄arin supe na purvanua taḗena apa akila ke kolau pania, a sa naña m̄ana kuruta na munen kila sitomena kien yeririna na yomarava la apa apiowa laa narui. Ana oimi, yoko nekila ko ovisu ya naña yoko imi m̄alivinia e pogos naña yoko naga war ruru kiena nakoena napo.”

<sup>3</sup> Ana navisi naḗani pimi p̄erelua ninuu, mli-gan inu nesike e yomema tai. Ana nepisu sira tai totano teke meta e purwolu na puluk tai. Sur mal nene pivaga make ga, naga p̄arina olua, a kana lam̄aliu lala tol lualima, a e yepen make ga asiri kia viowa lala navisalelekareen Ntewa.

<sup>4</sup> A sira naḗani, naga miyowau paḗisi e kulsota la naña amemaena a apivaga, a apaia kare yepena lala e mrakotal lala, a e pialaliga lala, a e sur la naña pe kol, a e kilavaru la naña merarava po naña kana kilavaru ne pa metava paḗisi, amio

sur la naŕa asike loyuńa e mratamelilivi. Naga mlarar ke piala tai naŕa pe kol, a piala nene pulen ga kiena ŕelaga viowa lala amio kiena kolau.

<sup>5</sup> Asiri visena tai sike e piamenana, pe visen wan ga tai, visena naŕani naga sane kia tai, naŕa pisa sanini, sape  
 “Papilon naŕa keviu,  
 anenane sira na mrapa lala,  
 purŕes nen ŕelaga la naŕa ape kororaki e yomarava.”

<sup>6</sup> Nepisu manene ŕa sira nene sanene, nepisu kilale sane mun wii ana maran telivi, a pe komin re naŕa mun kuruta na munena poli, ana komin naga mun ke kuruta kana li na lelagaena wa lala, nane la naŕa ańemońar la komin naŕa ataveve Yesu. Nepisu sira naŕa sanene narui, yepeu ŕili na ŕili!

<sup>7</sup> Ana navisi pisa pan inu, sape “E, ya ne kila omila manene sanene? Osuwa, yoko nevisa meraravan van ko na wa. Sira nene, ŕarar purwolu puluk naŕa teke e wos nena, a ŕarar ŕarina olua a kana lamńaliu lualima, suri la nene kala kinasia suńa ga, a yoko nekila ovisu kilale ne.

<sup>8</sup> “Purwolu puluk naŕa opisu ne, naga ŕeke kemua nakonua rui, ana naga pe su re si nagane poli. Ana e pog tai naŕa pimi ke ga wa, yoko molue si vetan pulus naŕa ŕeke e nagane, yoko vanon marŕanun kiena nakoarena. Ana e pogos nene, yoko yeririna na yomarava la naŕa asike ga wa, yoko avisu purwolu naŕane. Nane la naŕa

siar e nasiiena yomarava pimi, kiela kia pe su re e Tus na Malena poli. Pog naþa avisuia, ailan vaþisi, komin akilia asape naga sike kemua na konua rui, yoko pe su manene re si yam piavi poli, ana siraunia, naga molue sina.

<sup>9</sup> A yar naþa pe manmarua ruru po, yoko naga kilia visu kilale ruru kinas nen sur la naþa yoko nevisa.

“Nasumo, þarina la olua. Kana kinas, pisa pulkumali tai naþa sira nene pe suþenia, kunus olua sike ea. A kunus la nene, la mēna kala kinas suñā ga, naþa sape pupia þarin suþe la olua asuñā ga.

<sup>10</sup> Tol nagane, þarin suþe la lima nene aþis rui, a tai suñal sike nanagane. Tai mēna ga pe mālivi re poli wa, sike ga wa, a pog naþa imi, yoko su towe laa ve piavi na wa.

<sup>11</sup> “Ana purwolu puluk mēna, naþa suþes nanua a nagane pe mon re si poli, nanua sumo naga mēna þarin suþe la olua nene tai. Naga la ke tai narui, ana yoko wasuþe sina sane þarin suþe na orelu tai. Naga pe yerka wa sanene, ana pe sur koren ga, komin yoko naga mēna þisi, va war kiena nakoena mārera.

<sup>12</sup> “Sur taþena na vike meraravanena, nane lañaliu la lualima naþani. Nanene kala kinasia nane þarin suþe si lualima. La nene pe asuñal re poli wa vena ave suþen kiela lepas lala, ana yoko akila ga kiela yuñāen la na wa e pogos na purwolu nene suñalu. Yoko ave suþen pae yomarava nini amio, ana nane naga pe na yam plas ga, sa ga aora taaga.

13 “La lualima nañani, la tařatete akila kiela yumãena lala, ana la ape nakilaen ga yumãen kiena purwolu puluk nene, vena kiela namãreraena iila naga, vena kila naga imi ve keviu la sane.

14 Yoko la punu nene aim veraga vena akilali mara amio Narin Sipsip, ana tařatete atauluia. Peraga, ana yoko naga taulu la, komin naga ke narui naga pe suře kien suře lala, naga pe řarin suře kien řarin suře lala, a kiena yeririna nowo lala, nane la nařa naga pio la, naga mligan plan la, a la nane ave lelaga e naga.

15 “Sur navisa meraravanena tařena, naga wii lala amio sive lala nařa opisu sira viowa nene nařa towar la ke ne. Kala kinasa, naga yeririna la nařa asike e yomarava, amio yolai lala, a purvanua lala, a visena lala.

16 “Ana siraunia, purwolu puluk nene amio kana lamãliu lualima, yoko yepel mavin sira viowa nařani. Yoko asumãalu akila imi viowa van vařisi, nařa ayen plan mãana kulsota lala ve plamoñe e maran yar lala, a yoko akan make kana kilamãiu lala ana okoven kana puriu lala vito kapi kekania.

17 “E mrapa ne nanene nařa yoko akila va sira nene, tepisu sane torokin nena nakoarena nařa Ntewa pisawal e kiena visen tai nanua sumo rui, sinenan sape sira nene monar waria. Naga ga mligan e kiela sitomena lala amio purwolu puluk nene, vena akila sanene vania.”

18 Ana navisi nařani kila make kiena visena e poglis nene, sape “Nane navisa meraravanen sira nene narui, nařa naga pupia pulkumali

naña pe suñen ãarin suñe tañena lala e yomarava.”

## 18

### *Pulkumali viowa naña Páylon mloru*

<sup>1</sup> Yoko, nepisu navisi tañena molue ma e peni pitomi tano. Naga pe navisi mñarera tai kiena ne Ntewa, pitomi ãarar pupia namãareraena, a kana nategoliena kila yomarava pilavila.

<sup>2</sup> Naga pio e pupia pulgo tai naña pisawal sape “Pupia pulkumali viowa naña Páylon, mloru rui.

Nagane, yo nene pimi pe umã tai mmana yermare lala a pe yo tai naña ninuna viowa la atapolou ea.

Manu make ga naña akila ke ãelaga na kororak viowa lala, la mnea amẽ mla ponovi sike ea.

<sup>3</sup> Naga pa ãere ntewa la naña pe ape lelaga re poli, a ãere yeririna tañena la apa ape wowe amio, la sa ga yar la naña amun wii ãarila telivi. Sa ga naña naga pa ãere ãarin suñe na purvanua tañena lala, apa akila kolau amio, a yar la naña amiyumãen ke kilavaru e yomarava telivi piora, la ataulu kilavaru namname pañisi e yumãena viowa lala na pulkumali nene, pano pano-o apim ape yar na sur moki manene laa.”

<sup>4</sup> Navisi pisayu sanene ãisi, ana nemloge visen tañena kom ma e peni pitomi, pisa sanini, sape

“Kiau yeririna lala, o! Popon aurmatan yo nini vilaga,

visae peraga, naga warar amiu ava e kiena mlamulena viowa lala,

visae peraga, naga warar amiu m̃ena ava e kiena nakoena lala.

<sup>5</sup> Kiena mlamulena viowa lala ponpolo m̃aga pa tol ma e peni, a Ntewa taṣatete sinen ṣesan naṣa naga kilaroro kiena navisaluena yam via.

<sup>6</sup> Popon ga naṣa alamaran si naloge viowaena vania sa naṣa naga kila pa yar taṣena lala, popon aul maran vania va yam ve lua e ya naṣa naga kila rui.

Wii melkalka naṣa naga kila yar taṣena la amunia, popon akokonia ruru m̃ana piala ulemamaga.

<sup>7</sup> Nanua, kiena nalogewoena e kiena malena meme ga, naga keviu paṣisi, ana yoko vilon imi ve naloge viowaena e yepe lalaea lala amio tagiena lala.

Ana nanene na pere ke na wa, komin naga pilaven ke kiena sitomena na wa, suṃa pisa ke pania, sape ‘Ke, in na nepe ṣarin suṣe sira sanene, neto ruru na neteke ne. Sur make ga po manene laa pan inu, ana taṣatete nena neve sa letano tai naṣa pe kiena sur re poli, taṣatete nena netagin naloge viowaena pogos tai.’

<sup>8</sup> Ana naga, e legiena ta ne pimi ke ne, yoko sur viowa la kila kare ruru naga veraga. Yoko marena, warar tagiena, amio viso, a yoko kapi kekalele kare naga.



Naga pe sitom re sur poli, ana Suṽe Ntewa naṽa yoko liṽere naga, kiena naṽareraena naga keviu manene laa.”

<sup>9</sup> Ana navisi pisa sanini, sape “ṽarin suṽe make ga na yomarava nini telivi piora, la naṽa apa amlotun ke ntewa lala na pupia kumali nene, yoko avisu kilale naṽa naga mlor rui. La ke narui naṽa sane apa akila ke kolau amio, apa amloge po amio naga e kiena malena wo pano-o, pe asitom re nena sur tai.

“Ana pogos naṽa mloru, kana kap la naṽa kekan ke ne piuyu pa metava, nanene narui yoko sinela viowagan vaṽisi, yoko ataginia.

<sup>10</sup> Yoko avisu nakoena la naṽa naga suṽa ṽaria, yoko kila la ṽena asiar ayuyuwawa. Yoko asu la gar perina akira avisusuia, avisave ‘Ake, pupia Papilon, pulkumali naṽareraena, sinemimi miye ko paṽisi.

Lelaga naṽane, osu ruru ṽa pano-o, ana e aora taaga ga nene oṽal kioṽa luasa, omloru, oṽisi nenaga.’ ”

<sup>11</sup> A ṽarar ṽena, yar na stoa lala e yomarava wetelu yoko atagi a sinela yea, komin naṽa pe yar na ulen re si kiela sur la poli.

<sup>12</sup> Nanua sumo, akila kiela waa lala pulen ga tegaki nowo lala, sane sur la naṽa amiyuṽaen e kol ṽarar selpa, amio kilavaru na kupito naṽa pupia kilavaru, amio sur naṽa sike e mrakiav, a kulmrae la naṽa kala marala la powo, a lak la naṽa ponotaninu, a sur la naṽa amiyuṽaen e maluen elepen, pona e lak lala, pona e pototo lala, pona e kilavaru lala, ana nagane, kiela

yumãena na tauluen kilavaru la nene apim amlolor make ga.

<sup>13</sup> A e legien nene, yoko yar la ve aul re si sur na kilaen kinanen lala, sa naþa mñaki lala, þarar mrasil lala, pona yago lala, puluyavi na kilaen kilaparavi amio kona lala, þarar mñena sur na munen lala sane kuruta na munena. Yoko yar ve ul re si sur la ne sane ponotaninu a sirveve na mras nen olip, a sur na tauluen kilavaru la ea sa nanua sumo, sane puluk, sipsip, wosi þarar kana sur naþa þerewerea. Laþasa nanua sumo apuliwilin yar lala apim amiyumãae korena ga pan yerkaawa la sane, yoko ve akila re si narui, komin pogos naþa pupia pulkumali nene mloru, yoko yumãena toko narui, ana yar taþatete si taulu kilavaru na visuaren kiena malena.

<sup>14</sup> E pogos nene narui, yoko avisayu yo nene, avisave

“Ko sinoñan osape owar mrasnoñna la naþa ve kerkeviu ve moki, ana naga pe marua re poli wa, kekapil make rui.

Nanua, ko na lumoñna pule ruru nenaga, kionoña sur la punu ga po tanea paþisi wa, ana nagane kokovio make nenaga, taþatete nena yar tai visu si sur wo tai e ko narui.”

<sup>15</sup> A yar na wilwilenen sur la nene, naþa la ataulu kilavaru la mok li e rui, yoko asuñal ga asike perina akira vano, ailania a amaraun nakoena naþa pupia pulkumali nene sumã þaria. Yoko sinela ye vano-o vaþisi,

<sup>16</sup> yoko atagin vaþisi, avisave

“Ake, pupia kiamimi pulkumali, mesitom ko paþisi wa.

Nanua sumo ko na omyowau ruru po pañisi wa,  
oñar kotal a na kolmekiña la naña pe kol  
piataliga la ñar punu yepema lala,  
ana nagane na ko na peraga narui, kap mare.

<sup>17</sup> Sanapen na kioña pupia sur mok la nene  
kovio ga e narin aora taaga ga sanene?”

A yar lala na uararen ñeligas nen waa la naña  
nanua añarwar ke tegaki lala, ñarar kiela yar na  
yumæna lala, amio la naña akomkom ke e waa,  
pona ataulu kilavaru e sive, la mæna asumal ga  
asike perina apisu manene ke yo nañani.

<sup>18</sup> Pogos naña kana kap ne la piu, pa ke ma e  
sinapane, yoko avisasa yo nene avisave  
“Lelaga o, pulkumali nene na yo ta nene nañane,  
e yomerava nini yo tai pe sa re si nene poli.”

<sup>19</sup> La asitom sanene, a amloge piowa, akoven  
kare posnoyavi e ñarila ñisa, atagi, asape  
“Ake, kiamimi pupia pulkumali, piowa pan ko  
pañisi wa.

Ko na opulen ga kilavaru, ana memiyumæ e  
kiamimi waa lala, moñar kioña tegaki  
lala, pano pano-o imimi mæna ga moñal  
kilavaru naña miila imimi,  
ana nagane piowa narui.

E pogos plas ga nene, ana opim ope yo na  
kovioena ga.”

<sup>20</sup> Ana pogos naña pupia yo viowa nene mloru  
sanene, visena tai molue kom ma e peni, sape  
“Ma e peni, pupia kekarena a logewoena.  
Amiu nalelagaena wa lala, a nalologena lala a  
navisawalena kiena ne Ntewa, amiu akilia  
aieluar naga vañisi, komin naga mliþere

sira viowa nene rui, kila maran si pania komin napiowaena la naña kila pan amiu nanua.”

21 Ana e pogos nene, navisi tai pimi kawelua pupia kilavaru tai, kusyaun pa metavan þarina koven pito kopo sive, talilu pito kovio. Siraunia navisi nañani pisa sanini, sape

“Pupia pulkumali viowa naña Þapilon nanene narui, yoko akoven lua va ve sanene, akila naga loru vena taþatete si kilia sumãalu pog tai.

22 A ko Þapilon, visena na van ko sanini, sape yauena veraga amio yuka lala, yoko taþatete yar tai loge si e ko,

yar na kilaen yumãena lala, yoko taþatete si tai se ko pogos tai,

a yoko ve m̃aagena na vilien re si kinanena lala.

23 Yomerarava na kapi vivaga lala taþatete si tegoli kioṃa yo lala,

a yoko taþatete si ologe visena na kekarena kiena m̃ee amio sira m̃ee naña atalopa mare ga na wa.

Yar na kilaen kioṃa kilavaru lala, e yomarava nini pe tai torokin la re poli,

a nam̃areraena kiena ne kioṃa kimi lala a kioṃa navisokanena ga lala kila oþere sitomena kiena purvanua taþena lala apa ape wowe.”

24 Nane tepisu naña Þapilon nene, naga pe yo tai naña pe purþes nen napiowaena manenea. Navisawalena ai pona nalelagaena wa pona yar taþena naña aṃem̃ar la komin naña ape kiena ne Ntewa, ana kala kuruta la mlau e porotano na

pulkumali nena, naga ke nene narui, naþa kila naliþereena a nakoarena kiena ne Ntewa mloru ea m̃arera manene paþisi.

## 19

*Pupia kekarena ma metava komin naþa ma e peni taulu make suria*

<sup>1</sup> Siraun naga nene, nemloge pupia þina ma e peni apion manenea, asape

“Potena pan kieta Ntewa!

Tamaliaena, urarena a m̃areraena naga taaga ga kiena.

<sup>2</sup> Kiena naliþereena make ga ape lelaga a amesmesu paþisi.

Sira na mrapa la nene anela naga piowa ga, kiela na kolauena la akila yomarava pimi pe kororaki paþisi, ana Ntewa mliþere naga rui.

Ana naga mla pupia nakoarena tai pania komin kuruta kana kiena yar na yuþaena la naþa mlau.”

<sup>3</sup> Asum̃a amlolokai m̃a sanene, ana asikol ke sina ga, asape

“Potena pa Ntewa! Kapi kekan ke kororaki la nene rui, yoko kana kapi nena viu lue ga va metava narui.”

<sup>4</sup> Ana nasumonena la lualima yam lua pa vari [24] amio sur mali la vari akinai e marana ne Ntewa naþa totano teke meta e kiena yo wa, ana amlotun ke naga. Apionia, asape

“Po paþisi! Potena pan keviu!”

<sup>5</sup> A visen tai molue m̃ena e yo wa naþani, pisa sanini sape

“Kam na yar na kilaen yuñæna kiena ne Ntewa,  
amiu yerkawa lala a yeririna kar ga lala,  
kam make ga naña amlogear naga,  
nagane kana pog nena napo naieluarena.”

<sup>6</sup> Ana nemloge sina pupia ãina naña pio naña  
kiela mñaæna sa naña sive ãanpoia mumu, sane  
polilu. La asape

“Potena pania!

Kieta Suþe Ntewa na Mava, naga taulu make sur  
rui!

<sup>7</sup> Teieluar naga,

tevisirlua kiena kia, tekekarania.

Nagane pog wo na kilaen ãaþægena na talopaena  
kiena narin sipsip narui.

Wona na sira paia ruru naga su ruru ga sike na,

<sup>8</sup> a amiyowauia ruru naga e kulmrae viu wo lala,  
apowo a amerarava paþisi.”

Ana kulmrae nowo naña miyuwowo ne naña  
wona narin sipsip na sira miyenia, naga kana  
kinas toña ga, kana kinasa sane yuñæna wo la  
naña nalelagaena wa lala kiena ne Ntewa la akila  
rui.

<sup>9</sup> Ana navisi naña sike amio inu e pogos nene  
pis pan inu, sape

“Yoko nevisa kioña visena tai vena osirilua e  
kioña tus nene. Visena sanini, sane yar  
naña yoko avio naga vena naga mña va e  
kinanena na ãaþægena na talopaena kiena  
Narin Sipsip, yoko naga loge wo na wo  
vaþisi.”

A sikol sina visena nene, sape

“Naga visena lelaga tai kiena ne Ntewa naña pe lelaga pañisi.”

<sup>10</sup> Ana nemloge naga pisa sanene pan inu, nekinai pania, nesape nelotunia, ana naga pisalup̄aria. Pisape “Toko, ve okila re sanene van inu! Monar olotun ga Ntewa naga taaga. In na nepe kiena yar na yum̄aena ga, sane ko, a sa m̄ena wolai tañena la naña apiawa m̄arera ke e visena lelaga lala kiena ne Yesu. A po pañisi naña amiu asum̄a akila ke sanene, komin naña purp̄es nen kinas nen navisawalena lelaga make ga naña apisawal nanua pimi, naga Yesu ga ne, amio kiena visena lelaga la naña apuarar ke m̄arera.”

*Yar m̄arera naña kus wosi na miyuwowo*

<sup>11</sup> Ana e pogos nene, ma e peni pietava pan inu, nekira pa loyum̄a, nepisu wosi yuwowo tai naña po pañisi sum̄alar ga sike na, a yar m̄arera tai naña kusa totano teke ea. Naga ke narui naña kila mara suwo napiowaena, pona pogos naña kila kiena naliṗereena, ana naga miyum̄ae nena memes pañisi. Yar nena, apio kiena kia asape Parin Suṗe Lelaga Naviawaena.

<sup>12</sup> Ana kiena kia tañena m̄ena tai asiri sike ea pe yar tai kilia re kana kinas poli, naga taaga manene kilia. Kilamarana pilavila sane kap naña pivaga, a e ṗarina miyen ke karo na ṗarila kiena ne ṗarin suṗe lala.

<sup>13</sup> Naga miyen m̄ena m̄ana kulkota viavi tai naña aputon pito e kuruta vena kila ve maran la ea, ana naga kiena kia si tai na naña asum̄a apio naga ea, naga sanini, asape Visena Wa kiena ne Ntewa.

14 Ana e pogos nene, ðegas nen yar na mara lala nae ma e peni, amiyowau ruruia e kulmrae yuwowo a akus kiela wosi yuwowo lala, asumña ataveve ke kiela nasumonena nene apano.

15 Naga ðere la apano, kiena visena molue ke kome gona sane playu na mara naña mal ga lepas luwoka, naña yoko te plan purvanua na yomarava la akekapil. A siraun naña yoko naga taulu la, yoko naga sumñalu ve suñen la, a naga ðuarar ke plaki e limana, pototo tai naña urmi. Nakoena mñarera ya naña sinemimiena kiena ne Ntewa na mava ligan va yar la akusia, ana yerkawa ne nanene narui yoko naga war imi mñalivi.

16 Ana naga kiena kia tañena sike ga wa, naña asiri e mñana kulkota a e lana, sape  
“Parin Suñe kiena ne ðarin suñe lala, Yerkawa kiena ne yerkawa lala.”

17 Nepisu navisi tai sumñalar sike na naña yepisun tegolia, naga pion pa manu lala naña akaka ke metava ne, sape “Ei, kam punu ga aim lele taaga e pupia ðaþagena kiena ne Ntewa.

18 Kam manu na kanen tata lala, yoko ve ve piavi re ayumñen kinanena tai torokin amiu nenaga, naña tas nen yar mare lala kiena ne nasinekar kiena ne Ntewa. Parin suñe lala, pupia yerkawa na mara lala, yar mñarera lala, wosi na mara lala, amio la naña aþerela ke ne, amio yeririna kar ga lala la naña ape yerkawa pona ape yar ve torokaki na yumñena ga lala, la make



ga asuñalu vena akila mara va Ntewa, ana naga taulu la kila momar la pa ke ne.”

<sup>19</sup> Ana nepisu surmal viowa amio ãarin suñe na yomarava amio kiela ãegas na kilaen mara lala, apim amiyuwon vain la ke lele taaga. A sinelan asape akila mara amio naña kus ke wosi yuwowo ne amio kiena yar na kilaen mara lala.

<sup>20</sup> Ana asape akila mara narui, ana yar viowa lala amilan ga naña lepas kiena ne Ntewa asuñal veraga apa atarar kiela na sumonen luwoka naña atarar ruru la nenaga, nane sur mal viowa amio navisawalena naña pisosokan ga ne na pe yar naiilaena e kimi lala a sur nailanena lala. Sumo, naga miyuñaen sur la nene pisa kotalia ruru nena yar lala naña ãere kiela sitomena pano atañan añe tatu na sur mal viowa pa e piamenala, apa amlot wowe pa kiena nono.

Ana la atarar ruru nena nasumon-ena luwoka na ãegas viowa nene, ana akuwanpran luwoka pito e pulukapi naña mumu ke ne.

<sup>21</sup> Ana tañena la pe akila re mara poli wa, amilan ga playu na mara tai molue kome gona naña kus ke wosi yuwowo ne, pa sanene, pa sanene, te momar kare la amarmar pa ke ne. Ana taveve ya naña nepisua, manu na kanen kilanñiu lala apim atewowa tas nen marena la nañani, akan pano-o meñela la puleule.

## 20

*Apiar Yermare pa tol kas manu taaga [1000]*

<sup>1</sup> Ana nepisu navisi tai molue ma e peni pitomi tano, mlarar ke ki tai e limana, ki na pulutava na pulus nen marena naña pito na pitove pe luas re poli, a amio ki nena, p̄arar m̄ena sen m̄arera tai.

<sup>2</sup> Ana naga p̄ere mesmesun pupia nopi nene, naña pe yermarua loñara naña Yermare naña Yermare Lego, pa tarar ruru m̄arera, piar ruruia e sen, pisaar sape yoko mon m̄a sanene va tol kas manu ve taaga.

<sup>3</sup> Ana kutarar naga amio kana sen nañani koven pito e pupia pulus naña pito manene tano ne, ana kotawea, kiar ruru m̄eke ea, vena yar viowa nene ve va re si kilali yeririna lala na purvanua wetelu, va tol naña kas manu ve taaga nene warovia. A kiena m̄areraena taṗatete p̄isi make na wa, komin naña siraunia, e narin pogos tai ve plas ga, yoko naga kilia molue vena kila ke sina ga p̄arina yam tai.

<sup>4</sup> Ana nepisu yo wa lala, amio la naña atotano ateke e wos nela, naga la naña apisir plan la rui vena akilia aliṗere yar lala. A nepisu m̄ena ninun yar la moki naña asum̄a ga amio la, nane yar p̄es la naña amlologon Yesu amio visena wa kiena ne Ntewa, ana ateroro kolmekilania. La nene pe amlotun re sur mal viowa nene poli, pe akinain re kiena wonta poli, a pe aṗar re kiena tatu e piamenala poli, pona e limala, ana Ntewa kekaran la, kila la amal sina vena akilia asum̄al amio Kristo vena avisuar yo punu ga va tol luas nen kas manu ve taaga nañani.

<sup>5</sup> Naña amal si sanene, naga pogos p̄esia naña yeririna lala amal si petan marena, ana la ga nene atolia. Taṗena lala naña amare ga asike

na wa e pogos nene, la nene yoko atol ga kiela malena na wa e kana nalua nena, nane e luas nen kas na manu taaga nene.

<sup>6</sup> Navisa ruruena wo kiena ne Ntewa sike e la naña amal ñes sina vetan marena nene, naña la na kiela malena pe wa ruruia. Marena na lua tañatete nena tol la, ana yoko la ayuñae sane la ape yar wa kiena ne Ntewa, ape yar wa kiena Kristo, a yoko naga visir plan la avisuar yo amio naga e kas manu ve taaga nene.

### *Yermare, kana luas*

<sup>7</sup> Ana pogos naña kas manu ve taaga nene ñisi pae, yoko Yermare kilia molue sina e lele nakoena naña sike ea.

<sup>8</sup> E pogos nene, yoko naga va kar ga e purvanua punu ga e yomarava nini, visa kotalia si yar lala, a yoko naga werepran pupia ñegas lua nene aim ve taaga, nane yer Koko lala amio yer Makoko lala, vena aim si ave taaga vena akila mara va yeririna lala kiena ne Ntewa. A visae ñegas lua nene aimi ave taaga, la ave moki na ave moki, sane mras nen none la garo losi.

<sup>9</sup> Ana apureviraviran ruru la sa naña li na kilaen mara lala, amial vera ga akusro yomarava apim atol yo Yerusalem, yo naña Ntewa kekaran pañisi, naña naga yo kiena ne kiena yeririna la naña asike ea. Ana amiervivi ruru nena pupia pulkumali nañani, asape sinelan siaren mara narui. Ana amilan ga pupia kap tai molue veraga kom ma e peni pitomin la, kekan la pano-o kekan make la nena ga.

<sup>10</sup> A Yermare, naña naga pisa kotalia la sumo rui, akoven lua naga pa e pupia pulukapi naña mumu ke ne, nane kapi mā nena naña akoven surmali viowa amio navisawalena navisokanena lalua apa asike e rui. Ana la telu nene yoko akus naloge viowaena e yo nene ko legiena a kolemallo, vano vano-o ve uro re.

*Naliñereena maro kiena ne la naña pe amlelaga re poli*

<sup>11</sup> Ana nepisu pupia yo na liñereen yar lala, naña miyuwowo na miyuwowo, amio suñe keviu naliñereen yar lala totano teke metava ea. Kiena naurarena kokonia ruru make yo nene, kila porotano amio sinapane la luwoka añure apevenin plan la apano akovio.

<sup>12</sup> Ana nepisu pupia ñegas nen yar la tai, naga yar la naña amare nanua rui e yomarava, pupia yerkawa lala a yar kar make ga lala. Ana apim añalivi e nañani vena asuñal ase marana ne suñe keviu naliñereen yaru. Nepisu tus lañas pike ña suña ga, ana apa akus ke sina taña, naga asape Tus na Malena, ana naga mña apike. Ana apisu vevea asape alual ya naña asiriyu sike e tus nene e lepas kiena ne yar mare la nene, ana la peve taaga akus kiela nakoena taveve tus la nene.

<sup>13</sup> A yar mare la nene, amio mña la naña amarmare asike e sive, amio mña la naña amare apa asike e yo nalogeen viowa rui, la make ga aimin si naña aliperela taveve kiela yuñaena lala.

<sup>14</sup> Ana amliñere yar mare la nene pano-o ñisi, asuñalu akus sur lua nene naña marena amio

m̃ena yo nalogeeana viowa nene, ana akovenpran ga luwoka veraga vito e pulukapi. Ana marena naña yaru la atol e yo nene, naga asape marena na lua.

<sup>15</sup> A a si naña pe añal re kiena kia sike e Tus na Malena poli, naga ke narui akoven m̃ena naga vito e pupia pulukapi.

## 21

### *Pulkumali viu naña Yerusalem*

<sup>1</sup> Ana siraun nene, nepisu peni viu amio yomarava viu añalivi, komin peni nasumo amio yomarava nasumo amio kana porotano lala a kana sive nena, akokovio make nena rui.

<sup>2</sup> A nepisu pulkumali wa wo nene, Yerusalem viu, molue kom puna ne Ntewa ma e peni pitomi tano e yomarava. Nepisu naña apaia ruru po wa, sane sira tai naña amiyowauia po pañisi imin vena akila talopa amio wona.

<sup>3</sup> A e pogos nene nemloge visena wo tai molue ma e peni, pisawal sanini, sape  
“Nagane, Ntewa sinenan sape sike amio yeririna lala na yomarava, sinenan sape kila m̃ana uña sike pu la.

Yoko aim ave kiena yeririna lala, komin naña yoko naga amio la lue narui, yoko naga imi ve kiela Ntewa lelaga.

<sup>4</sup> Wamarala make ga, yoko naga yumuplania, yoko marena pona tagena pona yepelalaena pona naloge viowaena, la nene

peraga narui, komin naþa pogos marua  
nakonua la þaro pano pa kovio rui.”

<sup>5</sup> Visena nene þisi, ana yar wa naþa totano teke  
metava pisawalia, sape

“Ee, lelaga paþisi þan wa! Yoko in na nekila  
make sur la imi ve urviu sina!”

A naga sikol ke sina ga pisawal nena pan inu,  
sape

“Nanini yoko nevisa visen tai van ko naþa pe  
lelaga nena napo, naþa okilia owasine  
ruru nenaga, a popon osirilua.”

<sup>6</sup> Ana naga pis m̃a ga, sape

“Kiau yum̃aena make ga, nekila punu ruru nena  
ga!

In na in þesia a in maro, in na nasiarena a  
naluasiasa.

Yar naþa loge moto karia, yoko nevio m̃ana wii  
tai e purþes nen wii na malena, nela vania  
mun korenan ga sanene.

<sup>7</sup> Yaru naþa kiena malena þaro e pog m̃arera  
lala, sum̃al m̃arera sum̃a vano-o taulu  
viowaena, yoko naga tol navisa ruruena  
lala sane kiena lalimana. Yoko nesum̃a  
neve kiena ne Ntewa kemua lelaga, yoko  
noure naga imi ve naruu.

<sup>8</sup> Ana yar viowa lala, la m̃ena yoko atol kiela  
lalimana lala. Nane yar sur la naþa pe  
apiawa re m̃arera e in poli, naþa pe am-  
lelaga re poli, kiela þelaga piowowa paþisi,  
am̃em̃ar yar taþena, akila piowa amio sira  
pona yerm̃ene, aþar kimi, amlotun nono,  
ape yar navisokanena. La ke nene narui  
yoko ava atol marena na lua, nane e lelela

ke napo narui, nane pulukapi naña pe ponoyomñe, naña mñewo ðeale ga.”

<sup>9</sup> Visena nene nane ðisi ne, ana navisi nasumo la olua nene lala tai, naña añar pias nen sur olua na loge viowaena maro la olua na yomerava, pimi pio inu. Sape “Oim ke ne sumo wa, yoko nekila ovisu sira va talopa, nanene wona Narin Sipsip.”

<sup>10</sup> Ana ðerelua inu nepa ga e ninuu, ana imimi lua mepa metol pupia tavie tai metava. Imimi lua mesumñalu mese yo nene narui, kipian inu e pupia pulkumali wa naña Yerusalem, nepisu sina nomñal naña molue ma puna ne Ntewa ma e peni pitomi ke tano.

<sup>11</sup> Pitomi ke sanene narui, naurarena kiena ne Ntewa sumña puleule, kila tego pañisi, sa naña sur tai naña pilavila ruru po pañisi.

<sup>12</sup> A kana pupia kove nena miyervivi nenaga, pa metava na pa metava, a pupia pulutava lualima yam taaga pa lua [12] sike ea, naña kana navisi la peve taaga apisuar ruru la mñaga. A pulutava la make ga, tai kia sike ea, tai kia sike ea, naña kia kiena ne lus nae Israel la lualima yam taaga pa lua,

<sup>13</sup> naña pulutava telu sike lepas na lagawa, telu sike lepas na lagi pasipurua, telu sike lepas na mrae molue ea, a telu sike lepas na mrae pito tano ea.

<sup>14</sup> A pupia kove nena sumñalu sike e kana pupia kemrañe nena tol lualima yam taaga pa lua, asiri kia sike e peve taaga, naña kia la nene kiena nalologena la lualima yam taaga pa lua kiena narin sipsip.

<sup>15</sup> Ana navisi naña imimi lua mesun ke ne, naga kus ke natotou viavi tai naña kol e limana, vena va lual totou na pulkumali nene keviu sanape, amio kana kove nena a kana mratava lala.

<sup>16</sup> Kove na pulkumali nene, lepas varoka piavi maran taaga, ana navisi pa mla kana totou nena, taulu tasme manu lua [2000]. A mla mña totou na yepasia siar tano pa tol metava, maran taaga ke sina ga e kana lepas la vari nene.

<sup>17</sup> Pisi na pa pisu kana kove, mla totou na kana merorol nena, polo kana merpu ne lala pa taulu nena lualima yam orai [60] veraga.

<sup>18</sup> A kove nene pe amiyuñæn re e kilavaru kar ga la poli, ana miyuñæn e kilavaru tai naña kana marana la po pañisi, a pulkumali yepas make ga lala amiyuñæn ga e kol, mekiki po na po, pilavila po na po pañisi.

<sup>19</sup> A pupia kana kemrañe na kove nena, la mña ga apaia ruru la amio kilavaru la naña powo, naña tai amiyowa e kana kilavaru naña maran taaga sanene, tai mña amiyowa e kana kilavaru naña maran taaga sa ke ga, pano pano-o tol make kana kemrañe lualima yam taaga pa lua nene. A kia kiena ne kilavaru lualima yam taaga pa lua la nene, sanini. Nasumo, kiena kia saspas, na lua kiena kia sapaia, na telu, naga kalseton, na vari naga emrol,

<sup>20</sup> na lima naga satonik, na orai naga kanelion, na olua naga krisolaet, na orelu naga perol, na ovari naga toñas, na lualima naga krisopres, na lualima yam taaga pa taaga naga sasin, a na maro naña lualima yam taaga pa lua naga



ametis.

<sup>21</sup> A kana mratava lala, la make peve taaga ape pupia perel peve taaga. Ana nepisu mēna pupia mrapa na pulkumali nene, naŕa naga amiyuṁaen make nena e kol, po na po, pilavila paŕisi.

<sup>22</sup> Ana sur tai naŕa nemilania, nomape yoko nelual pupia yuṁa wa tai mēke likan pulkumali wa naŕani, ana nekira nomal re tai poli. Yo nene na pe yuṁa re na sanene poli, komin Ntewa na mava amio narin sipsip, yar la apa amlotun la e yo punu ga silaga.

<sup>23</sup> A nomal naŕa e pulkumali nene naga mrae amio kupario pe tego re e poli, komin narin sipsip naga sane kana yomerarava nena, naurarena kiena ne Ntewa kila yo make ga asike ga e yemlagi silaga.

<sup>24</sup> Purvanua taŕena lala yoko ayal e kana pupia yomerarava nena, a sur wo ya la naŕa pupia ŕarin suŕe taŕena na purvanua lala aŕar maga pe kiela, yoko awar van Yerusalem viu nene, sane kiela nalaena lala.

<sup>25</sup> Yo nene yemalolo taŕatete yoko imi e pogos tai, kila sanene pupia kana mratava ne lala kilia suwowo ga sumā silaga,

<sup>26</sup> a naurarena a sur wo lala na purvanua taŕena lala yoko asumā aim lue ga loyūṁa e silaga.

<sup>27</sup> Ana e lepa na sur la naŕa pe mekik ruru re nena poli, yoko taŕatete nena tai va loyūṁa e nene pogos tai, a yar ai naŕa kila yuṁaena naŕa na mawaena pona na visokanena, yoko naga mēna ga taŕatete va loyūṁa ea. La naŕa

navaen loyuma, naga la ga naña kiela kia, narin sipsip siri sike loyuma e kiena Tus na Malena rui.

## 22

### *Purþes nen wii na malena*

<sup>1</sup> Siraunia, navisi kilologia purþes nen wii na malena pan inu. Nepisu kana wii wo nena, merarava na merarava, mlau siar e yo wa kiena ne Ntewa naña Narin Sipsip sike ea.

<sup>2</sup> Kana wii ne mlau pano, kana yo naña mlau pa ea mlau nena pa likan pupia mrapa na pulkumali viu naña Yerusalem. Wii na malena nene mlau sanene pano, a purþes nen lak na malena lala asuñal asike lepas luwoka. Laki la nene apo pañisi, komin naña añar mrasa e kupario make ga, yam lualima yam taaga pa lua [12] e kas taaga. A ñas ñena lala, apowo pañisi, komin naña akilia akila ruru maiena kien yolai na purvanua make ga na yomarava.

<sup>3</sup> Sanene, yoko þelaga viowa la kiena ne Yermare na kila kareen sur make ga, yoko e pulkumali nene naga peraga narui. Narin sipsip sike e yo wa kiena ne Ntewa e yo nene, a pulen ga kiena yar lala naña kiela yumaena, amlot lue ga e silaga.

<sup>4</sup> Asike ga lavisinia, a asiri kiena kia sike e piamenala.

<sup>5</sup> E yo nene, pe yemalolo re si poli, yo merarava make silaga, a pe yomerarava na kap vivaga re tai poli, pona mrae. Peraga, Suþe Ntewa ga pe purþes nen yomerarava naña tegoli ruru ke yo

nene, a naga ðere kiena yeririna la naþani, pisir plan la ape þarin suþe na visuaren sur make ga.

*Nawasuþeena kiena ne Yesu*

<sup>6</sup> Ana navisi naþa pis pan inu, sape “Sur la naþa opisuia pona omloge, ape lelaga paþisi, a yoko aim ave lelaga make nena napo. Kieta Suþe keviu, naga Ntewa naþa navisawalena na sumo lala amiyumãe e kiena ninuna, naga pitetalia imimi kiena navisi lala mepim momãalivin ko vena mekipian ko e sur la nene. Naga kila sanene komin naþa naga sinenan sape kiena yeririna lala monar akilia sur la naþa yoko ve ve piavi re aim amãalivi.”

<sup>7</sup> A visena kiena ne Yesu e lele nene pa pan kiena yeririna lala sanini, sape “Avisuaria! Ve ve piavi re, neimin nomãalivin amiu sina. Yar naþa tarar visena la nene m̃arera, naþa apisawal sike e kiau tus wa nene, yoko wo van vaþisi, yoko naga loge wo vaþisi.”

*Yoane pis maro*

<sup>8</sup> Inu naþa nepisu sur lala nene, nemloge visena la nene, inu yermarua Yoane. A pogos naþa nepisu make pae, nemloru nekinai e lana navisi naþa naga kipian inunia, nemloge sane sineun nesape nelotunia.

<sup>9</sup> Ana naga pisalupar inu, sape “Toko, ve okila re sanene. In m̃ena nepe yar na yumãena kiena ne Ntewa ga, sanene ko omio womla la naþa navisawalena la nanua sumo, amio m̃ena yar taþena la naþa apuarar ruru ke visena na tus wa la nene. Popon telotun kieta Ntewa naga taaga ga.”

10 A naga pisa m̃ena visen taṣena pan inu, sape “Ve owarwan re navisawalena lala naṣa sike e tus nene. Pog pimi ke lavis narui, popon yar la akilia ya naṣa asuṃa apisa ke ne.

11 Yar naṣa yepena ma yagogena, yoko kila kiena ṣelaga viowa va viowa laa sane, yoko kororaki na kiena mlamulen viowa lala va viowa ve keviu manene laa. Ana yar naṣa loge, yoko kiena yuṃaena mesmes lala aimi awo vaṣisi, yoko kiena ṣelaga wo lala aim ave wa ruru nenaga.”

12 Visena kiena Yesu e lele nene, naga sanini, sape “Avisuaria! Nepimin ke naṣa ve ve piavi re nenaga nom̃alivin amiu. Neimi nemio kiau nalaen wo lala naṣa powo, naṣa yoko nekian plan va yar lala taveve yuṃaena wo la naṣa akila pan inu.

13 Inu ṣesia a inu maro, inu nasumo a inu nasirau, inu nasiarena a inu naluasia na sur make ga.

14 “Ve ve piavi re, yoko pupia navisa ruruena imi m̃alivin ruru nena kiau yeririna lala. Apuvan ruru m̃ala kulsota lala, amiyowau ruru rui, ana akilia ava awarpo yo e pulutava vena ava loyuṃa e pulkumali wa kiena ne Ntewa, akilia ava atol purlaki na malena.

15 Ana yar taṣena la mokliu naṣa taṣatete avam loyuṃa. Nane yar la naṣa asuṃa apa kar ga sane lokul lala, amio la naṣa aṣar kimi, amio la naṣa ataṣa kolau amio lau, la naṣa aṃeṃar

yarū, la naḡa amlotun nono lala, a la naḡa sinelan asape akila ḡelaga lala na visokanena.

16 “In na Yesu, nemligan navisi nene pimin vena visawal visena la nene van ko, vena okilia ova ola va kiau sumare make ga. Navisaarena naḡa apisaar asape molue kome lus kiena ne yermarua Parin Suḡe Tepet nanua, in ne nanini. In na nepe verue naḡa Melag, naḡa pisawal ke sape lavis yelagi imi warpoyo narui.”

17 Ninuna ne Ntewa mloge visena nene, pisawal pa Yesu sape “Pogaga, okilia oimi!”

Sira naḡa na talopaena amio, sape “Ee, popon oim narui!”

A yar ai naḡa loge visena la nene, popon naga m̃ena visawalia, visave “Ake Yesu, visae oim ga rui!”

Yar naḡa loge moto karia, avietava vania vena kilia vam loyum̃a. Yar naḡa sinenan imiena, yoko naga kilia tol m̃ana wii na malena, sa naḡa kiena nalaena tai naḡa pimi ga sa ga nene.

18 Ana nevisa visena m̃arera tai van amiu naḡa yoko aloge visena lala na visawalena lala na tus wa nene. Visae yar tai sukol si visen taḡena tai to metavan naḡa sike pa rui, yoko Ntewa kila naga war naloge viowaena make ga naḡa tus nene pisa ke pa rui.

19 Pona visae yar tai lalua si visena laḡas naḡa sike pa rui, yoko Ntewa lalua si lalimana vetania naḡa sike e purlaki na malena, yoko naga taḡatete tol sur wo la sa naḡa tus wa nene sape asike loyum̃a e pulkumali wa.

<sup>20</sup> Naga naña pisawal visena la nene, pisape “Sa ke nene narui. Ve ve piavi re, yoko neim nomalivin amiu.”

A sitomena kiena ne yeririna kiena ne Ntewa lala, asape “Visae ve sa nene, wo vañisi. Awis Yesu, oim vilaga!”

<sup>21</sup> A visena maro na lepas na sunena na kiau mñeniena, in yermarua Yoane nemlen nesape yoko lemamiena wo kiena kieta Supe Yesu sike amio amiu, kam yeririna lala kiena ne Ntewa.

Sanene.

**Lologena Wo Kienane Yesu Kristo Kome  
Kewo  
The New Testament in the Lewo Language of Epi  
Island, Vanuatu  
Le Nouveau Testament en Lewo langue de l'île d'Épi  
au Vanuatu — Niutestamen long Lewo lanwis, blong  
Epi Aelan, Vanuatu**

copyright © 2016 Wycliffe Bible Translators, Inc.

Language: Lewo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 18 Apr 2025 from source files dated 31 Aug 2023

ee028e1c-7e53-571d-8041-681daaf580e8